

柳田文庫  
文庫11  
D 303  
67



文庫 11  
D 303  
67

明史卷二百八十五


列傳第一百七十二

總督總理事務經筵管保兼太子保籍殿學士兼提督內閣書事如級張廷壽奉

敕修

文苑一

明初文學之士承元季虞柳黃吳之後師友講貫學有本原宋濂王禕方孝孺以文雄高楊張徐劉基袁凱以詩著其他勝代遺逸風流標映不可指數蓋蔚然稱盛已永宣以還作者遞興皆冲融演迤不事鉤棘而氣體漸弱弘正之間李東陽出入宋元溯流唐代擅聲館閣而李夢陽何景明倡言復古文自西京詩自中唐而下



48-11029

010190568356

一切吐棄操觚談藝之士翕然宗之明之詩文於斯一  
變迨嘉靖時王慎中唐順之輩文宗歐曾詩倣初唐李  
攀龍王世貞輩文主秦漢詩規盛唐王李之持論大率  
與夢陽景明相倡和也歸有光頗後出以司馬歐陽自  
命力排李何王李而徐渭湯顯祖袁宏道鍾惺之屬亦  
各爭鳴一時於是宗李何王李者稍衰至啟禎時錢謙  
益艾南英準北宋之矩矱張溥陳子龍擬東漢之芳草  
又一變矣有明一代文士卓卓表見者其源流大抵如  
此今博考諸家之集參以衆論錄其著者作文苑傳

楊維禎

陸居仁  
錢惟善

胡翰

蘇伯衡

戴良 王逢  
丁鶴年

張以寧 石光霽  
秦裕伯

徐一夔

陶宗儀 顧德輝等

高啟 楊基等

孫蕢 王佐等

楊維禎字廉夫山陰人母李夢月中金錢墜懷而生維  
禎少時日記書數千言父宏築樓鐵崖山中繞樓植梅  
百株聚書數萬卷去其梯俾誦讀樓上者五年因自號

明倫彙編 家範典 卷一百一十五  
一  
鐵崖元泰定四年成進士署天台尹改錢清場鹽司令  
狷直忤物十年不調會修遼金宋三史成維楨著正統  
辯千餘言總裁官歐陽元功讀且嘆曰百年後公論定  
於此矣將薦之而不果轉建德路總管府推官擢江西  
儒學提舉未上會兵亂避地富春山徙錢塘張士誠累  
招之不赴遣其弟士信咨訪之因撰五論具書復士誠  
反覆告以順逆成敗之說士誠不能用也又忤達識丞  
相徙居松江之上海內薦紳大夫與東南才俊之士造  
門納履無虛日酒酣以往筆墨橫飛或戴華陽巾披羽  
衣坐船屋上吹鐵笛作梅花弄或呼侍兒歌白雪之辭

自倚鳳翥和之賓客皆踟躕起舞以爲神仙中人洪武  
二年太祖召諸儒纂禮樂書以維楨前朝老文學遣翰  
林詹同奉幣詣門維楨謝曰豈有老婦將就木而再理  
嫁者邪明年復遣有司敦促賦老客婦謠一章進御曰  
皇帝竭吾之能不強吾所不能則可否則有蹈海死耳  
帝許之賜安車詣闕廷留百有一十日所纂敘例畧定  
卽乞骸骨帝成其志仍給安車還山史館曾監之士祖  
帳西門外宋濂贈之詩曰不受君王五色詔白衣宣至  
白衣還蓋高之也抵家卒年七十五維楨詩名擅一時  
號鐵崖體與永嘉李孝光茅山張羽錫山倪瓚崑山顧

瑛爲詩文友碧桃叟釋臻知歸叟釋現清容叟釋信爲  
方外友張甫稱其古樂府出入少陵二李間有曠世金  
石聲宋濂稱其論撰如觀商敦周彝雲雷成文而寒芒  
橫逸詩震蕩陵厲鬼設神施尤號名家云維楨徙松江  
時與華亭陸居仁及僑居錢惟善相倡和惟善字思復  
錢塘人至正元年省試羅剎江賦時鎖院三千人獨惟  
善据枚乘七發辨錢塘江爲曲江由是得名號曲江居  
士官副提舉張士誠據吳遂不仕居仁字宅之中泰定  
三年鄉試隱居教授自號雲松野衲兩人旣歿與維楨  
同葬干山人目爲三高士墓

胡翰字仲申金華人幼聰穎異常兒七歲時道拾遺金  
坐守待其人還之長從蘭谿吳師道浦江吳萊學古文  
復登同邑許謙之門同郡黃潛相貫以文章名天下見  
翰文稱之不容口游元都公卿交譽之與武威余闕宣  
城貢師泰尤善或勸之仕不應旣歸遭天下大亂避地  
南華山著書自適文章與宋濂王禕相上下太祖下金  
華召見命與許元等會食中書省後侍臣復有薦翰者  
召至金陵時方籍金華民爲兵翰從客進曰金華人多  
業儒鮮習兵籍之徒糜餉耳太祖卽罷之授衢州教授  
洪武初聘修元史書成受賚歸愛北山泉石卜築其下

徜徉十數年而終年七十有五所著有春秋集義文曰  
胡仲子集詩曰長山先生集

蘇伯衡字平仲金華人宋門下侍郎轍之裔也父友龍  
受業許謙之門官蕭山令行省都事明師下浙東坐長  
子仕闕謫徙滁州李善長奏官之力辭歸伯衡警敏絕  
倫博洽群籍爲古文有聲元末貢於鄉太祖置禮賢館  
伯衡與焉歲丙午用爲國子學錄遷學正被薦召見擢  
翰林編修力辭乞省覲歸洪武十年學士宋濂致仕太  
祖問誰可代者濂對曰伯衡臣鄉人學博行修文詞蔚  
然有法太祖卽徵之入見復以疾辭賜衣鈔而還二十

一年聘主會試事竣復辭還尋爲處州教授坐表箋誤  
下吏死二子恬怡救父并被刑

王冕字元章諸暨人幼貧父使牧牛竊入學舍聽諸生  
誦書暮乃返亡其牛父怒撻之已而復然母曰兒癡如  
此曷不聽其所爲冕因去依僧寺夜坐佛膝上映長明  
燈讀書會稽韓性聞而異之錄爲弟子遂稱通儒性卒  
門人事冕如事性屢應舉不中棄去北游燕都客祕書  
卿秦不花家擬以館職薦力辭不就旣歸每大言天下  
將亂攜妻孥隱九里山樹梅千株柳杏半之自號梅花  
屋主善畫梅求者踵至以幅長短爲得米之差嘗飯周

明史卷一百一十五 列傳 五  
官著書一卷曰持此遇明王伊呂事業不難致也太祖  
下婺州物色得之置幕府授諮議參軍一夕病卒同時  
郭奎鐘炳皆早參戎幕以詩名奎字子章巢縣人從余  
闕學治經闕亟稱之太祖爲吳國公來歸從事幕府朱  
文正開大都督府於南昌命奎參其軍事文正得罪奎  
坐誅炳字彥昇鄱陽人至正中從軍於浙太祖起淮南  
獻書言事用爲中書典籤洪武初從事大都督府出爲  
知縣閱兩考以病告歸久之卒

鄭良字叔能浦江人通經史百家醫醫卜釋老之說學  
古文於黃潛柳貫吳萊貫卒經紀其家太祖初定金華  
命與胡翰等十二人會食省中日二人更番講經史陳  
治道明年用良爲學正與宋濂葉儀輩訓諸生太祖既  
旋師良忽棄官逸去辛丑元順帝用薦者言授良江北  
行省儒學提舉良見時事不可爲避地吳中依張士誠  
久之見士誠將敗挈家泛海抵登萊欲間行歸擴廓軍  
道梗高昌樂數年洪武六年始南還變姓名隱四明山  
太祖物色得之十五年召至京師試以文命居會同館  
日給大官膳欲官之以老疾固辭忤旨明年四月暴卒  
蓋自裁也元亡後惟良與王逢不忘故主每形於歌詩  
故卒不獲其死云良世居金華九靈山下自號九靈山

人逢字原吉江陰人至正中作河清頌臺臣薦之稱疾  
辭張士誠據吳其弟士德用逢策北降於元以拒明太  
祖滅士誠欲辟用之堅臥不起隱上海之烏涇歌咏自  
適洪武十五年以文學徵有司敦迫上道時子掖爲通  
事司令以父年高叩頭泣請乃命吏部符止之又六年  
卒年七十有梧溪詩集七卷逢自稱席帽山人時又有  
丁鶴年者回回人曾祖阿老丁與弟烏馬兒皆巨商元  
世祖征西域軍乏饟老丁杖策軍門盡以貲獻論功賜  
田宅京師奉朝請烏馬兒累官甘肅行省左丞父職馬  
祿子以世廕爲武昌縣達魯花赤有惠政解官留葬其

地至正三辰武昌被兵鶴年年十八奉母走鎮江母歿  
鹽醪不入口者五年遊地四明方國珍據浙東最忌色  
目人鶴年轉徙逃匿爲童子師或寄僧舍賣漿自給及  
海內大定牒請還武昌而生母已道阻前死瘞東村廢  
宅中鶴年慟哭行求母告以夢乃嚙血沁骨斂而葬焉  
烏斯道爲作丁孝子傳鶴年自以家世仕元不忘故國  
順帝北遁後飲泣賦詩情詞悽惻晚學浮屠法廬居父  
墓以永樂中卒鶴年好學洽聞精詩律楚昭莊二王咸  
禮敬之正統中憲王刻其遺文行世  
危素字太樸金谿人唐撫州刺史全諷之後少讀五經



遊吳澄范梈門至正元年用大臣薦授經筵檢討修宋  
遼金三史及注爾雅成賜金及官人不受出國子助教  
遷翰林編修纂后妃等傳事逸無據素買餼饋宦寺  
叩之得寶乃筆諸書卒爲金史遷太常博士兵部員外  
郎監察御史工部侍郎轉太司農丞禮部尙書時亂將  
亟素每抗論得失十八年參中書省事請專任平章定  
住總西方兵毋迎帝師悞軍事用普顏不花爲參政經  
畧江南立兵農宣撫使司以安畿內任賢守令以撫流  
竄之民且曰今日之事宜臥薪嘗膽力圖中興尋進御  
史臺治書侍御史二十年拜參知政事俄除翰林學士

承旨出爲嶺北行省左丞言事不報棄官居房山素爲  
人侃直數有建白敢任事上都宮殿火敕重建大安磨  
忽二閣素諫止之請親祀南郊築北郊以斥合祭之失  
因進講陳民間疾苦詔爲發錢粟振河南永平民淮南  
兵亂素往家問假便宜發楮幣振維揚京口饑居房山  
者四年明師將抵燕淮王帖木兒不花監國起爲承旨  
如故素甫至而師入乃趨所居報恩寺入并寺僧大梓  
力挽起之曰國史非公莫知公死是死國史也素遂止  
兵迫史廬往告鎮撫吳勉輩出之元實錄得無失洪武  
二年授翰林侍講學士數訪以元興亡之故且詔撰皇

陵碑文皆稱旨頃之坐失朝被劾罷居一歲復故官兼  
弘文館學士賜小車免朝謁嘗借諸學士賜宴屢遣內  
官勸之酒御製詩一章以示恩寵命各以詩進素詩最  
後成帝獨覽而善之曰素老成有先憂之意時素已七  
十餘矣御史王著等論素亡國之臣不宜列侍從詔誦  
居和州守余闕廟歲餘卒先是至元間西僧嗣古妙高  
欲毀宋會稽諸陵夏人楊瑋真珈爲江南總攝悉掘徽  
宗以下諸陵攫取金寶哀帝后遺骨瘞於杭之故宮築  
浮屠其上名曰鎮南以示厭勝又截埋宗顛骨爲飲器  
真珈敗其資皆籍於官顛骨亦入宣政院以賜所謂帝  
師者素在翰林時宴見備言始末帝歎息良久命北平  
守將購得顛骨於西僧汝納所諭有司厝於高坐寺西  
北其明年紹興以永穆陵圖來獻遂敕葬故陵實自素  
發之云

張以寧字志道古田人父一清元福建江西行省參知  
政事以寧年八歲歲訟其伯父於縣繫獄以寧詣縣伸  
理尹異之命賦琴堂詩立就伯父得釋以寧用是知名  
泰定中以春秋舉進士由黃巖判官進六合尹坐事免  
官滯留汀淮者十年順帝徵爲國子助教累遷翰林侍  
讀學士知制誥在朝宿儒虞集歐陽元揭傒斯黃潛之

屬相繼物故以寧有俊才博學強記擅名於時人呼小  
張學士明師取元都與危素等皆赴京奏對稱旨復授  
侍講學士特被寵遇帝嘗登鍾山以寧與朱升秦裕伯  
等扈從擁翠亭給筆札賦詩洪武二年秋奉使安南封  
其主陳日燿爲國王御製詩一章遣之南抵境而日燿  
卒國人乞以印詔授其世子以寧不聽留居湘江上諭  
世子告哀於朝且請襲爵旣得命俟後使者林唐臣至  
然後入境將事事竣教世子服三年喪令其國人效中  
國行頌首稽首禮天子聞而嘉之賜璽書比諸陸賈馬  
援再賜御製詩八章及還道卒詔有司歸其柩所在致

祭以寧爲人潔清不營財產奉使往還襍被外無他物  
本以春秋致高第故所學尤專春秋多所自得譔胡傳  
辨疑最辨博惟春王正月考未就寓安南踰半歲始卒  
業元故官來京者素及以寧名尤重素長於史以寧長  
於經素宋元史藁俱失傳而以寧春秋學遂行門人石  
光霽字仲濂泰州人讀書五行俱下洪武十三年以明  
經舉授國子學正進博士作春秋鈞元能傳以寧之學  
裕伯字景容大名入仕元累官至福建行省郎中遭世  
亂棄官客揚州久之復避地上海居母喪盡禮張士誠  
據姑蘇遣人招之拒不納吳元年太祖命中書省檄起

之裕伯對使者曰食元祿二十餘年而背之不忠也母喪未終忘哀而出不孝也乃上中書省固辭洪武元年復徵稱病不出帝乃手書諭之曰海濱民好鬪裕伯智謀之士而居此地堅守不起恐有後悔裕伯拜書涕泗橫流不得已偕使者入朝授侍讀學士固辭不允與張以寧等扈從登鍾山擁翠亭給筆札賦詩甚見寵待二年改待制旋爲治書侍御史三年始詔設科取士以裕伯與御史中丞劉基爲京畿主考官裕伯博辨善論說占奏悉當帝意帝數稱之出知隴州卒於官

趙壘字伯友新喻人好學工屬文元至正中舉於鄉爲

上猶教諭洪武二年太祖詔修元史命左丞相李善長爲監修官前起居注宋濂漳州府通判王禕爲總裁官徵山林遺逸之士汪克寬胡翰宋僖陶凱陳基曾魯高啟趙汭張文海徐尊生黃篋傅恕王綺傅著謝徽爲纂修官而壘與焉以是年二月開局天界寺取元經世大典諸書用資參考至八月成諸儒並賜賚遣歸而順帝一朝史猶未備乃命儒士歐陽佑等往北平采遺事明年二月還朝重開史局仍以宋濂王禕爲總裁徵四方文學士朱右貝瓊朱廉王彝張孟兼高遜志李懋李汝張宣張簡杜寅段弼俞寅及壘爲纂修官先後纂修三

十人兩局並與者壘一人而已閱六月書成諸儒多授  
官惟壘及朱右朱濂不受歸尋召修日曆授翰林編修  
高麗遣使朝貢賜宴樂作使者以國喪辭壘進曰小國  
之喪不廢大國之禮太祖甚悅命與宋濂同職史館濂  
兄事之嘗奉詔撰甘露頌太祖稱善出爲靖江王府長  
史卒始與壘同纂修者汪克寬陶凱曾魯高啟趙訪貝  
瓊高遜志並有傳今自宋僖以下可考者附著於篇宋  
僖字無逸餘姚人元繁昌教諭遭亂歸史事竣命典福  
建鄉試陳基字敬初臨海人少與兄聚受業於義烏黃  
潛從潛游京師授經筵檢討嘗爲人草諫章力陳順帝

並后之失順帝欲罪之引避歸里已奉母入吳參太尉  
張士誠軍事士誠稱王基獨諫止欲殺之不果吳平召  
修元史賜金而還洪武三年冬卒初士誠與太祖相持  
基在其幕府書檄多指斥及吳亡吳臣多見誅基獨免  
世所傳夷白集其指斥之文猶備列云張文海鄞人與  
同里傅恕並入史館徐尊生字大年淳安人元史成受  
賜歸復同修日曆後以宋濂薦授翰林應奉文字草制  
悉稱旨尋以老疾辭還傅恕字如心鄞人學通經史與  
同郡烏斯道鄭真皆有文名洪武二年詣闕陳治道十  
二策曰正朝廷重守令馭外蕃增祿秩均民田更法役

黜異端易服制興學校慎選舉罷權鹽停權茶太祖嘉  
納之遂命修元史事竣授博野知縣後坐累死斯道字  
繼善慈谿人與兄本良俱有學行洪武中斯道被薦授  
石龍知縣調永新坐事謫役定遠放還卒斯道工古文  
兼精書法子緝亦善詩文洪武四年舉鄉試第一授臨  
淮教諭入見賜之宴賦詩稱旨除廣信教授自號榮陽  
外史傳著字則明長洲人史成歸爲常熟教諭魏觀行  
鄉飲酒禮長洲教諭周敏侍其父南老著侍其父玉皆  
降而北面立觀禮者以爲盛事焉歷官知府卒謝徽字  
元懿長洲人史成授翰林國史院編修尋擢吏部郎中

力辭不拜歸復起國子助教卒徽博學工詩文與同邑  
高啟齊名弟恭字元功亦能詩朱右字伯賢臨海人中  
成辭歸已徵修日曆實訓授翰林編修遷晉府右長史  
九年卒官朱廉字伯清義烏人幼力學從黃潛學古文  
知府王宗顯辟教郡學李文忠鎮嚴州廷爲釣臺書院  
山長洪武初元史成不受官歸尋徵修日曆除翰林編  
修八年扈駕中都進詩十章太祖稱善爲和六章賜之  
已而授楚王經遷楚府右長史久之辭疾歸廉好程朱  
之學嘗取朱子語類摘其精義名曰理學纂言王彝字  
常宗其先蜀人父爲崑山教授遂卜居嘉定少孤貧讀

書天台山中師事王貞文得蘭谿金履祥之傳學有端緒嘗著論力詆楊維禎目爲文妖元史成賜銀幣還又以薦入翰林母老乞歸坐知府魏觀事與高啟俱被殺張孟兼浦江人名丁以字行史成授國子學錄歷禮部主事太常司丞劉基嘗爲太祖言今天下文章宋濂第一其次卽臣基又次卽孟兼太祖領之孟兼性傲嘗坐累謫輸作已復官太祖顧孟兼謂濂曰卿門人邪濂對非門人乃邑子也其爲文有才臣劉基嘗稱之太祖熟視孟兼曰生骨相薄仕宦徐徐乃可耳未幾用爲山西僉事兼勁疾惡糾摘奸猾令相牽引每事輒株連數十

人吏民間張僉事行部凜然墮膽聲聞於朝擢山東副使市政使吳印者僧也太祖驟貴之寵眷甚孟兼易之印謁孟兼由中門入孟兼杖守門卒已又以他事與相挂太祖先入印言逮笞孟兼孟兼憤捕爲印書奏者欲論以罪印復上書言狀太祖大怒曰豎儒與我抗邪械至關下命棄市李汶字宗茂當塗人博學多才史成除巴東知縣移南和晚年歸里以經學訓後進張宣字藻重江陰人洪武初以考禮徵尋預修元史太祖親書其名召對殿廷卽日授翰林編修呼爲小秀才奉詔歸娶年已三十矣六年坐事謫徙濠梁道卒張簡字仲簡吳

縣人初師張雨爲道士隱居鴻山元季兵亂以母老歸  
養遂返儒服洪武三年薦修元史當元季浙東西士大  
夫以文墨相尙每歲必聯詩社聘一二文章鉅公主之  
四方名士畢至讌賞窮日夜詩勝者輒有厚贈臨川饒  
介爲元淮南行省參政豪於詩自號醉樵嘗大集諸名  
士賦醉樵歌簡詩第一贈黃金一餅高啟次之得白金  
三斤楊基又次之猶贈一鎰杜寅字彥正吳縣人史成  
官岐寧衛知事洪武八年番賊旣降復叛寅與經歷熊  
鼎俱被害

徐一夔字大章天台人工文與義烏王禕善洪武二年

八月詔纂修禮書一夔及儒士梁寅劉子曾曾周子諒  
胡行簡劉宗弼董彝蔡深勝公琰並與焉明年書成將  
續修元史禕方爲總裁官以一夔薦一夔遺書曰邇者  
縣令傳命言朝廷以續修元史見徵且云執事謂僕善  
敘事薦之當路私心竊怪執事何倦倦於不材多病之  
人也僕素謂執事知我今自審終不能副執事之望何  
也近世論史者莫過於日曆日曆者史之根柢也自唐  
長壽中史官姚璠奏請撰時政記元和中韋執誼又奏  
撰日曆日曆以事繫日以日繫月以月繫時以時繫年  
猶有春秋遺意至於起居注之說亦專以甲子起例蓋



紀事之法無論此也往宋極重史事日曆之修諸司必  
關白如詔誥則三省必書兵機邊務則樞司必報百官  
之進退刑賞之予奪臺諫之論列給舍之繳駁經筵之  
論答臣僚之轉對侍從之直前啟事中外之囊封匭奏  
下至錢穀甲兵獄訟造作凡有關政體者無不隨日以  
錄猶患其出於吏牘或有訛失故歐陽修奏請宰相監  
修者於歲終檢點修撰官日所錄事有失職者罰之如  
此則日曆不至訛失他時會要之修取於此實錄之修  
取於此百年之後紀志列傳取於此此宋氏之史所以  
爲精確也元朝則不然不置日曆不置起居注獨中書

置時政科遣一文學掾掌之以事付史館及一帝崩則  
國史院據所付修實錄而已其於史事固甚疎畧幸而  
天曆間虞集倣六典法纂經世大典一代典章文物粗  
備是以前局之史既有十三朝實錄又有此書可以參  
稽而一時纂修諸公如胡仲申陶中立趙伯友趙子常  
徐大年輩皆有史才史學厯而成書至若順帝三十六  
年之事既無實錄可據又無參稽之書惟憑採訪以足  
成之竊恐事未必覈也言未必馴也首尾未必穿貫也  
而向之數公或受官或還山復各散去乃欲以不材多  
病如僕者承之於後僕雖欲仰副執事之望曷以哉謹

明史卷一百八十五 列傳 七  
奉狀左右乞賜於察一夔遂不至未幾用薦署杭州教授召修大明日曆書成將授翰林院官以足疾辭賜文綺遣還

趙撝謙名古則更名謙餘姚人幼孤貧寄食山寺與朱右謝肅徐一夔輩定文字交天台鄭四表善易則從之受易定海樂良鄭鄭真明春秋山陰趙俶長於說詩注兩善樂府廣陵張昱工歌詩無爲吳志淳華亭朱芾工草書篆隸撝謙悉與爲友博究六經百氏之學尤精六書作六書本義復作聲音文字通時目爲考古先生洪武十二年命詞臣修正韻撝謙年二十有八應聘入京

師授中都國子監典簿久之以薦召爲瓊山縣學教諭二十八年卒於番禺其後門人柴欽字廣敬以庶吉士與修永樂大典進言其師所撰聲音文字通當采錄遂奉命馳傳卽其家取之樂良字季本迺而字士霖趙俶字本初洪武中官國子監博士以年老乞歸加翰林待制張昱字光弼廬陵人仕元爲江浙行省左右司員外郎行樞密院判官留居西湖壽安坊貧無以葺廬酒間爲瞿佑誦所作詩笑曰我死埋骨湖上題曰詩人張員外墓足矣太祖徵至京憫其老曰可閒矣厚賜遣還乃自號可閒老人年八十三卒吳志淳字主一元末知靖

安都昌一縣奏除待制翰林爲權倖所阻避兵於鄞朱  
芾字孟辨洪武初官編修改中書舍人

陶宗儀字九成黃巖人父煜元福建江西行樞密院都  
事宗儀少試有司一不中卽棄去務古學無所不窺出  
游浙東西師事張翥李孝光杜本爲詩文咸有程度尤  
刻志字學習舅氏趙雍篆法浙帥泰不華南臺御史丑  
驢舉爲行人又辟爲教官皆不就張士誠據吳署爲軍  
諮亦不赴洪武四年詔徵天下儒士六年命有司舉人  
才普及宗儀引疾不赴晚歲有司聘爲教官非其志也  
二十九年卒諸生赴禮部試讀大誥賜鈔歸久之卒所

著有輟耕錄三十卷又葺說郭書史會要四書備道並  
傳於世顧德輝字仲瑛崑山人家世素封輕財結客豪  
宕自喜年三十始折節讀書購古書名畫彝鼎祕笈築  
別業於茜涇西曰玉山佳處晨夕與客置酒賦詩其中  
四方文學士河東張翥會稽楊維禎天台柯九思永嘉  
李孝光方外士張雨于彥成琦元璞董成圭其家園池  
亭榭之盛圖史之富暨館聲伎並冠絕一時而德輝  
才情妙麗與諸名士亦畧相當嘗舉茂才授會稽教諭  
辟行省屬官皆不就張士誠據吳欲強以官去隱於嘉  
興之合溪尋以子元臣爲元水軍副都萬戶封德輝武

畧將軍飛騎尉錢塘縣男母喪歸綽溪士誠再辟之遂  
斷髮廬墓自號金粟道人及吳平父子並徙濠梁洪武  
二年卒士誠之據吳也頗收召知名士東南士避兵於  
吳者依焉孫作字大雅江陰人爲文醇正典雅動有據  
依嘗著書十二篇號東家子宋濂爲作東家子傳元季  
挈家避兵於吳盡棄他物獨載書兩籠士誠原祿之旋  
以母病謝去客松江衆爲買田築室居焉洪武六年聘  
修大明日曆授翰林編修乞改太平府教授召爲國子  
助教尋分教中都踰年還國學擢授司業歸卒於家元  
末文人最盛其以詞學知名者又有張憲周砥高明藍  
仁之屬張憲字思廉山陰人學詩於楊維禎最爲所許  
負才不羈嘗走京師恣言天下事衆駭其狂還入富春  
山混緇流以自放一日升高呼所親語曰禍至矣亟去  
三日而寇至死者五百家後仕張士誠爲樞密院都事  
吳平變姓名奇食杭州報國寺以歿周砥字履道吳人  
僑無錫博學工文詞與宜興馬治善遭亂客治家治爲  
具舟車盡窮陽羨山溪之勝其鄉多富人與治善者咸  
置酒招砥砥心厭之一日貽書別治夜半遁去游會稽  
歿於兵治字孝常亦能詩洪武時爲內邱知縣終建昌  
知府高明字則誠永嘉人至正五年進士授處州錄事

詳行省掾方國珍叛省臣以明諳海濱事擇以自從與  
論事不合及國珍就撫欲留置幕下即日解官旅寓鄞  
之樸社太祖聞其名召之以老疾辭還卒於家藍仁字  
靜之弟智字明之崇安人元時清江杜本隱武夷崇尚  
古學仁兄弟俱往師之授以四明任士林詩法遂謝科  
舉一意爲詩後辟武夷書院山長遷邵武尉不赴內附  
後例徙濠梁數月放歸卒智洪武十年被薦起家廣西  
僉事著廉聲

袁凱字景文松江華亭人元末爲府吏博學有才辨議  
論輒發往往屈座人洪武三年薦授御史武臣恃功驕  
恣得罪者漸衆凱上言諸將習兵事恐未悉君臣禮請  
於都督府延通經學古之士令諸武臣赴都堂聽講庶  
得保族全身之道帝放臺省延名士直午門爲諸將說  
書後帝慮因畢命凱送皇太子覆訊多所矜減凱還報  
帝問朕與太子孰是凱頓首言陛下法之正東宮心之  
慈帝以凱老猶持兩端惡之凱懼佯狂免告歸久之以  
壽終凱工詩有盛名性詼諧自號海叟背戴烏巾倒騎  
黑牛游行九峰間好事者至繪爲圖初在楊維禎座客  
出所賦白燕詩凱微笑別作一篇以獻維禎大驚賞徧  
示座客人遂呼袁白燕云

高啟字季迪長洲人博學工詩張士誠據吳啟依外家  
居吳淞江之青邱洪武初被薦偕同縣謝徽召修元史  
授翰林院國史編修官復命教授諸王三年秋帝御闕  
樓啟徽俱入對擢啟戶部右侍郎徽吏部郎中啟自陳  
年少不敢當重任徽亦固辭乃見許已並賜白金放還  
啟嘗賦詩有所諷刺帝嫌之未發也及歸居青邱授書  
自給知府魏觀爲移其家郡中旦夕延見甚歡觀以改  
修府治獲譴帝見啟所作上梁文因發怒腰斬於市年  
三十有九明初吳下多詩人啟與楊基張羽徐賁稱四  
傑以配唐王楊盧駱云基字孟載其先蜀嘉州人祖宦

吳中生基遂家焉九歲背誦六經及長著書十萬餘言  
名曰論鑿遭亂隱吳之赤山張士誠辟爲丞相府記室  
未幾辭去客饒介所明師下平江基以饒氏客安置臨  
濠旋徙河南洪武二年放歸尋起爲滎陽知縣謫居鍾  
離被薦爲江西行省幕官以省臣得罪落職六年起官  
奉使湖廣召還授兵部員外郎遷山西副使進按察使  
被讒奪官謫輸作竟卒於工所初會稽楊維禎客吳中  
以詩自豪基於座上賦鐵笛歌維禎驚喜與俱東語從  
游者曰吾在吳又得一鐵矣若曹就之學優於老鐵學  
也張羽字來儀後以字行本潯陽人從父宦江浙兵阻

不獲歸與友徐賁約卜居吳興領鄉薦爲安定書院山  
長再徙於吳洪武四年徵至京師應對不稱旨放還再  
徵授太常司丞太祖重其文十六年自述滁陽王事命  
羽撰廟碑尋坐事竄嶺南未半道召還羽自知不免投  
龍江以死羽文章精潔有法尤長於詩作畫師小米徐  
賁字幼文其先蜀人徙常州再徙平江工詩善畫山水  
張士誠辟爲屬已謝去吳平謫徙臨濠洪武七年被薦  
至京九年春奉使晉冀有所廉訪暨還檢其橐惟紀行  
詩數首太祖悅授給事中改御史巡按廣東又改刑部  
主事遷廣西參議以政績卓異擢河南左布政使大軍

征洮岷道其境坐犒勞不時下獄瘐死

王行字止仲吳縣人幼隨父依賣藥徐翁家徐媪好聽  
稗官小說行日記數本爲媪誦之媪喜言於翁授以論  
語明日悉成誦翁大異之俾盡讀家所有書遂淹貫經  
史百家言未弱冠謝去授徒齊門名士咸與交富人沈  
萬三延之家塾每文成酬白金鎰計行輒麾去曰使富  
而可守則然臍之慘不及矣洪武初有司延爲學校師  
已謝去隱於石湖其二子役於京行往視之京國公藍  
玉館於家數薦之太祖得召見後玉誅行父子亦坐死  
始吳中用兵所在多列礮石自固行私語所知曰兵法

柔能制剛若植大竹於地繫布其端礮石至布隨之低昂則人不能害而礮石無所用矣後常遇春取平江果如其法行亦自負知兵以及於禍云初高啟家北郭與行比隣徐賁高遜志唐肅宋克余堯臣張羽呂敏陳則皆卜居相近號北郭十友又稱十才子啟賁遜志羽自有傳唐肅字處敬越州山陰人通經史兼習陰陽醫卜書數少與上虞謝肅齊名稱會稽二肅至正壬寅舉鄉試張士誠時爲杭州黃岡書院山長遷嘉興路儒學正士誠敗例赴京尋以父喪還洪武三年用薦召修禮樂書擢應奉翰林文字其秋科舉行爲分考官免歸六年

謫佃濠梁卒子之淳字愚士宋濂亟稱之建文二年用方孝孺薦擢翰林侍讀與孝孺共領修書事卒於官謝肅官至福建僉事坐事死宋克字仲溫長洲人偉軀幹博涉書史少任俠好學劍走馬家素饒結客飲博迨壯期酒徒學兵法周流無所遇益以氣自豪張士誠欲羅致之不就性抗直與人議論期必勝援古切今人莫能難也杜門染翰日費十紙遂以善書名天下時有宋廣字昌裔亦善草書稱二宋洪武初克任鳳翔同知卒堯臣字唐卿永嘉人入吳爲士誠客城破例徙濠梁洪武二年放還授新鄭丞呂敏字志學無錫人元時爲道士



洪武初官無錫教諭十三年舉人才不知其官所終陳則字文度崑山人洪武六年舉秀才授應天府治中俄擢戶部侍郎以闕實戶口出爲大同府同知進知府孫蕢字仲衍廣東順德人性警敏書無所不窺詩文援筆立就詞采爛然負節槩不妄交游何真據嶺南開府辟士與王佐趙介李德黃哲並受禮遇稱五先生廖永忠南征蕢爲真草降表永忠辟典教事洪武二年始行科舉蕢與其選授工部織染局使遷虹縣主簿兵燹後蕢勞徠安輯民多復業居一年召爲翰林典籍與修洪武正韻九年遣監祀四川居久之出爲平原主簿坐累逮繫俾築京師望都門城垣蕢謔爲粵聲主者以奏召見命誦所歌詩語皆忠愛乃釋之十五年起爲蘇州經歷復坐累戍遼東已大治藍玉黨蕢嘗爲玉題畫遂論死臨刑作詩長謳而逝時門生黎貞亦戍遼東蕢屍乃得收斂貞字彥晦新會人工詩文嘗爲本邑訓導以事被誣戍遼陽十八年從游者甚衆放還卒蕢所著有通鑑前編綱目孝經集善理學訓蒙及西菴集和陶集多佚不傳番禺趙純稱其究極天人性命之理爲一時儒宗云王佐字彥舉先河東人元末侍父官南雄經亂不能歸遂占籍南海與蕢結詩社構辭敏捷佐不如蕢

何意沉著黃亦不如佐何真使佐掌書記參謀議真歸  
朝佐亦還里洪武六年被薦徵爲給事中太祖賜宋濂  
黃馬復爲歌命侍臣屬和佐立成性不樂樞要將告歸  
時告者多獲重譴或尼之曰君少忍獨不虞性命邪生  
乃遲徊二年卒乞骸歸趙介字伯貞番禺人博通六籍  
及釋老書氣豪邁無仕進意行以囊自隨遇景賦詩投  
其中日往來西樵泉石間有司累薦皆辭免洪武二十  
二年坐累逮赴京卒於南昌舟次四子潔綯繹純皆善  
詩文工篆隸綯隱居不出有父風純仕御史李德字仲  
修番禺人洪武三年以明經薦授洛陽典史歷南陽西

安二府幕官並能其職以年衰乞改漢陽教諭秩滿調  
義寧義寧在粵西荒陋甚德爲振舉文教漸興解官歸  
卒德初好爲詩晚究洛閩之學謂誠意爲古聖諦心要  
說嶺南人稱理學必曰李仲修云黃哲亦番禺人歷仕  
州郡以治行稱

王蒙字叔明湖州人趙孟頫之甥也敏於文不尚集度  
工畫山水兼善人物少時賦宮詞仁和俞友仁見之曰  
此唐人佳句也遂以妹妻焉元末官理問遇亂隱居黃  
鶴山自稱黃鶴山樵洪武初知泰安州事蒙嘗謁胡廣  
庸於私第與會稽郭傳僧知聰觀畫惟庸伏法蒙坐事

被逮瘐死獄中郭傳一名正傳字文遠洪武七年帝御武樓賜學士宋濂坐謂曰天下既定朕方垂意宿學之士卿知其人乎對曰會稽有郭傳者學有淵源其文雄贍新麗其議論根據六經異才也既而濂持其文以進帝召見於謹身殿授翰林應奉直起居注遷兵部主事再遷考功監丞進監令出署湖廣布政司參政

明史卷二百八十五終

明史卷二百八十六

列傳第一百七十四

敕修

總督總理事務 羅謙景保兼李太保和殿學士兼管吏部戶部尚書加六級張廷壽奉

文苑二

林鴻 鄭定等 王紱 夏景

沈度 弟榮 滕用亨等 聶大年

劉溥 蘇平等 張弼

張泰 陸容 陸鉞 程敏政

羅玘 儲燿

李夢陽 康海 王九思 何景明

月良卷三頁六 刊傳

徐禎卿

楊循吉 唐寅

祝允明 顧

貢

顧

璘

弟

栗

沂等

鄭善夫

殷雲霄

方 豪等

陸

深

王

圻

王廷陳

李 濂

林鴻字子羽福清人洪武初以人才薦授將樂縣訓導歷禮部精膳司員外郎性脫落不善仕年未四十自免歸閩中善詩者稱十才子鴻為之冠十才子者閩鄭定侯官王褒唐泰長樂高棟王恭陳亮永福王偁及鴻弟子周元黃元時人自為二元者也鴻論詩大指謂漢魏骨氣雖雄而菁華不足晉祖元虛宋尚條鳴齊梁以正

但務春華少秋實惟唐作者可謂大成然貞觀尚習故陋神龍漸變常調開元天寶間聲律大備學者當以是為楷式閩人言詩者率本於鴻晉府引禮舍人浦源字長源無錫人也慕鴻名踰嶺訪之造其門二元請誦所作曰吾家詩也鴻延之入社鄭定字孟宣嘗為陳友定記室友定敗浮海亡交廣聞久之還居長樂洪武中徵授延平府訓導歷國子助教王褒字中美鴻之兄子婿也為長沙學官遷永豐知縣永樂中召入預修大典擢漢府紀善唐泰字亨仲洪武二十七年進士歷陝西副使高棟字彥恢更名廷禮別號漫士永樂初以布衣召

入翰林爲待詔遷典籍性善飲工書畫尤專於詩其所  
選唐詩品彙唐詩正聲終明之世館閣宗之王恭字安  
中隱居七巖山自稱皆山樵者永樂初以儒士薦起待  
詔翰林年六十餘與修大典書成授翰林院典籍陳亮  
字景明自以故元儒生明興累詔不出作陳搏傳以見  
志結草屋滄洲中與三山耆彥爲九老會終其身不仕  
王侗字孟敷父翰仕元抗節死侗方九歲父友吳海撫  
教之洪武中領鄉薦入國學陳情養母母歿廬墓六年  
永樂初用薦授翰林檢討與修大典學博才雄最爲解  
縉所重自負無輩行獨推讓同官王洪王洪者字希範

錢塘人八歲能文十八成進士授吏科給事中改翰林  
檢討偕侗等與修大典歷修撰侍講帝頒佛曲於塞外  
命洪爲文逡巡不應詔爲同列所排不復進用卒官而  
侗後坐累謫交趾復以縉事連及繫死獄中黃元字元  
之將樂人聞鴻棄官歸遂攜妻子居閩縣以歲貢官泉  
州訓導周元字微之閩縣人永樂中以文學徵授禮部  
員外郎嘗挾書千卷止高棟家讀十年辭去盡棄其書  
曰在吾腹笥矣同時趙迪林敏陳仲宏鄭關林伯璟張  
友謙亦以能詩名皆鴻之弟子

王紱字孟端無錫人博學工歌詩能書寫山木竹石妙

絕一時洪武中坐累戍朔州永樂初用薦以善書供事  
文淵閣久之除中書舍人紱未仕時與吳人韓奕爲友  
隱居九龍山遂自號九龍山人於書法動以古人自期  
畫不苟作游覽之頃酒酣握筆長廊素壁淋漓灑灑有  
投金幣購片楮者輒拂袖起或閉門不納雖豪貴人勿  
顧也有諫之者紱曰丈夫宜審所處輕者如此重者將  
何以哉在京師月下聞吹簫聲乘興寫石竹圖明日訪  
其人贈之則估客也客以紅氍毹請再寫一枝爲配  
紱索前畫裂之還其餽一日退朝黔國公沐晟從後呼  
其字紱不應同列語之曰此黔國公也紱曰我非不聞

之是必與我索畫耳晟走及之果以畫請紱頷之而已  
踰數年晟復以書來紱始爲作畫旣而曰我畫直遺黔  
公不可黔公客平仲微者我友也以友故與之俟黔公  
與求則可耳其高介絕俗如此崑山夏景者亦善畫竹  
石亞於紱畫竹一枝直白金一錠然人多以餽遺得之  
景字仲昭永樂十三年進士改庶吉士歷官太常寺卿  
景與上元張益同中進士同以文名同善畫竹其後景  
見益石渠閣賦自謂不如遂不復作賦益見景所畫竹  
石亦遂不復畫竹益死土木之難仲微名顯錢塘人嘗  
知滕縣事謫戍雲南其爲詩頗豪放自喜雲南詩人稱

平居陳郭顯其一也

沈度字民則弟粲字民望松江華亭人兄弟皆善書度以婉麗勝粲以道逸勝度博涉經史爲文章絕去浮靡洪武中舉文學弗就坐累謫雲南岷王具禮幣聘之數進諫未幾辭去都督瞿能與偕入京師成祖初卽位詔簡能書者入翰林給廩祿度與吳縣滕用亨長樂陳登同與選是時解縉胡廣梁潛王璉皆工書度最爲帝所賞名出朝士右日侍便殿凡金版玉冊用之朝廷藏秘府頒屬國必命之書遂由翰林典籍擢檢討歷修撰遷侍講學士粲自翰林待詔遷中書舍人擢侍讀進階大

理少卿兄弟竝賜織金衣鏤姓名於象簡泥之以金贈父母如其官馳傳歸告於墓崑山夏昂者字孟暘與其弟景以善書畫聞同官中書舍人時號大小中書而度粲號大小學士度性敦實謙以下人嚴取與有訓導介其友求書請識姓字於上度沈思曰得非曩訐奏有司者耶遽却之其友固請終不肯書姓名其在內廷備顧問必以正對粲篤於事兄已有賜輒歸其兄滕用亨初名權字用衡精篆隸書被薦時年七十矣召見大書麟鳳龜龍四字以進又獻貞符詩三篇授翰林待詔與修永樂大典用亨善鑒古嘗侍帝觀畫卷未竟衆目爲趙

伯駒用亨曰此王詵筆也至卷尾果然陳登字思孝初  
仕羅田縣丞改蘭谿再改浮梁選入翰林仍給縣丞祿  
歷十年始授中書舍人登於六書本原博考詳究用力  
甚勤自周秦以來殘碑斷碣必窮搜摩搨審度而辨定  
之得其傳者太常卿南城程南雲也

聶大年字壽卿臨川人父同文洪武中官翰林侍書中  
書舍人燕王入京師迎謁道暘死死後五月而大年生  
母胡撫之比長博學善詩古文葉盛稱其詩謂三十年  
來絕唱也書得歐陽率更法宣德末薦授仁和訓導母  
卒歸葬哀感行路里人列其母子賢行上之有司詔旌

其門服闋分教常州遷仁和教諭景泰六年薦入翰林  
未幾得疾卒始尚書王直以詩寄錢塘戴文進索畫自  
序昔與文進交嘗戲作詩一聯至是十年始成之大年  
題其後曰公愛文進之畫十年不忘使以是心待天下  
賢者天下寧復有遺賢哉直聞其言不怒亦不薦及大  
年疾篤作詩貽直有鏡中白髮孰憐我湖上青山欲待  
誰句直曰此欲吾志其墓耳遂爲之志

劉溥字原博長洲人祖彥父士賓皆以醫得官溥八歲  
賦溝水詩時目爲聖童長侍祖父遊兩京研究經史兼  
通天文曆數宣德時以文學徵有言溥善醫者授惠民



局副使調太醫院吏目恥以醫自名日吟咏爲事其詩  
初學西崑後更奇縱與湯允勣蘇平蘇正沈愚王淮晏  
鐸鄒亮蔣忠王貞慶號景泰十才子溥爲主盟允勣東  
甌王和曾孫自有傳蘇平字秉衡弟正字秉貞海寧人  
兄弟竝以布衣終沈愚字通理崑山人業醫終其身王  
淮字柏源慈谿人晏鐸字振之富順人由庶吉士授御  
史歷按兩畿山東所至有聲坐言事謫上高典史鄉境  
寇發官兵不能討鐸捕滅之歸所掠於民鄒亮字克明  
長洲人用况鍾薦擢吏部司務遷御史蔣忠字主忠儀  
真人徙居句容王貞慶字善甫駙馬都尉寧子也折節

好士有詩名時稱金粟公子

張弼字汝弼松江華亭人成化二年進士授兵部主事  
進員外郎遷南安知府地當兩廣衝奸人聚山谷爲惡  
悉捕滅之毀淫祠百數十區建爲社學謝病歸士民爲  
立祠弼自幼穎拔善詩文工草書怪偉跌宕震撼一世  
自號東海張東海之名流播外裔爲詩信手縱筆多不  
屬稿卽有所屬以書故輒爲人持去與李東陽謝鐸善  
嘗自言吾平生書不如詩詩不如文東陽戲之曰英雄  
欺人每如此不足信也鐸稱其好學不倦詩文成一家  
言子弘至自有傳

張泰字亨父太倉人陸鉞字鼎儀崑山人陸容字文量亦太倉人三人少齊名號婁東三鳳泰舉天順八年進士選庶吉士授檢討遷修撰爲人恬淡自守詩名亞李東陽弘治間藝苑皆稱李懷麓張滄洲東陽有懷麓堂集泰有滄洲集也鉞與泰同年進士殿試第二授編修歷修撰諭德孝宗立以東宮講讀勞進太常少卿兼侍讀得疾歸泰鉞皆早卒容成化中進士授南京主事進兵部職方郎中西番進獅子奏請大臣往迎容諫止之遷浙江參政罷歸

程敏政字克勤休寧人南京兵部尚書信子也十歲侍

父官四川巡撫羅綺以神童薦英宗召試悅之詔讀書翰林院給廩饌學士李賢彭時咸愛重之賢以女妻焉成化二年進士及第授編修歷左諭德直講東宮翰林中學問該博稱敏政文章古雅稱李東陽性行真純稱陳音各爲一時冠孝宗嗣位以宮僚恩擢少詹事兼侍講學士直經筵敏政名臣子才高負文學常俯視儕偶頗爲人所疾弘治元年冬御史王嵩等以雨災劾敏政因勒致仕五年起官尋改太常卿兼侍讀學士掌院事進禮部右侍郎專典內閣誥敕十二年與李東陽主會試舉人徐經唐寅預作文與試題合給事中華景劾敏

政嘗題時榜未發詔敏政毋閱卷其所錄者令東陽會同考官覆校二人卷皆不在所取中東陽以聞言者猶不已敏政景經寅俱下獄坐經嘗贊見敏政寅嘗從敏政乞文黜爲吏敏政勒致仕而景以言事不實調南太僕主簿敏政出獄憤恚發癰卒後贈禮部尚書或言敏政之獄傅瀚欲奪其位令景奏之事祕莫能明也

羅玘字景鳴南城人博學好古文務爲奇奧年四十困諸生輸粟入國學邱濬爲祭酒議南人不得留北監玘固請不已濬罵之曰若識幾字崛彊乃爾玘仰對曰惟中祕書未讀耳濬姑留之他日試以文乃大驚異成化

未領京闈鄉試第一明年舉進士選庶吉士授編修益肆力古文每有作或據高樹或閉坐一室瞑目隱度形容灰稿自此文益奇玘亦厚自負尤尚節義臺諫救劉遜盡下獄玘言當優容以全國體中官李廣死遺一籍具識大臣賄交者帝怒命言官指名劾奏玘上言曰大臣表正百僚今若此固宜重典然天下及四裔皆仰望之一旦指名暴其惡啓遠人慢朝廷心言官未見籍記憑臆而論安辨玉石一經攻摘且玷終身臣請降敕密諭使引疾退或斥以他事庶不爲朝廷羞而仕路亦清李夢陽下獄玘言壽寧侯託肺腑當有以保全之夢

陽不保爲侯累帝深納焉秩滿進侍讀正德初遷南京  
太常少卿劉瑾亂政李東陽依違其間玘東陽所舉士  
也貽書責以大義且請削門生之籍尋進本寺卿擢南  
京吏部右侍郎遇事嚴謹僚屬畏憚畿輔盜縱橫而皇  
儲未建玘疏論激切且侵執政者七年冬考績赴都遂  
引疾致仕歸寧王宸濠慕其名遣使餽玘避之深山及  
叛玘已病馳書守臣約討賊事未舉而卒嘉靖初賜諡  
文肅學者稱圭峰先生

儲懽字靜夫秦州人九歲能屬文母疾剖股療之卒不  
起家貧力營墓域旦哭冢夜讀書不輟成化十九年鄉  
試明年會試皆第一授南京考功主事孝宗嗣位疏薦  
前直諫貶謫者主事張吉王純中書舍人丁璣進士李  
文祥吉等皆錄用久之進郎中吏部尚書耿裕知其賢  
調北部考注臧否一出至公嘗覈實一官裕欲改其評  
懽正色曰公所執何異王介甫羣僚咸在側裕大慚徐  
曰郎中言是然非我莫能容也擢太僕少卿請命史官  
記注言動如古左右史時不能用進本寺卿武宗立塞  
上有警條禦邊五事又陳馬政病民者四事多議行正  
德二年改左僉都御史總督南京糧儲召爲戶部右侍  
郎尋轉左督倉場所至宿弊盡釐劉瑾用事數陵侮大

臣獨敬懼稱爲先生懼憤其所爲五年春引疾求去詔許乘傳有司俟疾痊以聞其秋瑾敗以故官召辭不赴後起南京戶部左侍郎就改吏部卒官懼體貌清癯者不勝衣淳行清修介然自守工詩文好推引知名士辟遠非類不惡而嚴進士顧璘嘗謁尚書邵寶寶語曰子立身當以柴墟爲法柴墟者懼別號也嘉靖初賜諡文懿

李夢陽字獻吉慶陽人父正官周王府教授徙居開封母夢日墮懷而生故名夢陽弘治六年舉陝西鄉試第一明年成進士授戶部主事遷郎中權關格勢要構下

獄得釋十八年應詔上書陳二病三害六漸凡五千餘言極論得失未言壽寧侯張鶴齡招納無賴罔利賊民勢如翼虎鶴齡奏辨摘疏中陛下厚張氏語誣夢陽訕母后爲張氏罪當斬時皇后有寵后母金夫人泣愬帝帝不得已繫夢陽錦衣獄尋宥出奪俸金夫人愬不已帝弗聽召鶴齡問處切責之鶴齡免冠叩頭乃已左右知帝護夢陽請母重罪而予杖以洩金夫人憤帝又弗許謂尚書劉大夏曰若輩欲以杖斃夢陽耳吾寧殺直臣快左右心乎他日夢陽途遇壽寧侯言之擊以馬箠墮二齒壽寧侯不敢校也孝宗崩武宗立劉瑾等八虎

用事尚書韓文與其僚語及而泣夢陽進曰公大臣何泣也文曰奈何曰比言官劾羣奄閣臣持其章甚力公誠率諸大臣伏闕爭閣臣必應之去若輩易耳文曰善屬夢陽屬草會語洩文等皆逐去瑾深憾之矯旨謫山西布政司經歷勒致仕既而瑾復撫他事下夢陽獄將殺之康海爲說瑾乃免瑾誅起故官遷江西提學副使令甲副使屬總督夢陽與相抗總督陳金惡之監司五日會揖巡按御史夢陽又不往揖且敕諸生毋謁上官卽謁長揖毋跪御史江萬實亦惡夢陽淮王府校與諸生爭夢陽笞校王怒奏之下御史按治夢陽恐萬實右

王訐萬實詔下總督金行勘金檄布政使鄭岳勘之夢陽僞撰萬實劾金疏以激怒金并構岳子沄通賄事寧王宸濠者浮慕夢陽嘗請撰陽春書院記又惡岳乃助夢陽劾岳萬實復奏夢陽短及僞爲奏章事參政吳廷舉亦與夢陽有隙上疏論其侵官不俟命徑去詔遣大理卿燕忠往鞫召夢陽羈廣信獄諸生萬餘爲訟寃不聽劾夢陽陵轍同列挾制上官遂以冠帶閒住去亦褫岳職謫戍沅奪廷舉俸夢陽旣家居益跣弛負氣治園池招賓客日縱俠少射獵繁臺晉邱閒自號空同子名震海內宸濠反誅御史周宣劾夢陽黨逆被逮大學士

楊廷和尚書林俊力救之坐前作書院記削籍頃之卒  
子枝進士夢陽才思雄鷲卓然以復古自命弘治時宰  
相李東陽主文柄天下翕然宗之夢陽獨譏其萎弱倡  
言文必秦漢詩必盛唐非是者弗道與何景明徐禎卿  
邊貢朱應登顧璘陳沂鄭善夫康海王九思等號十才  
子又與景明禎卿貢海九思王廷相號七才子皆卑視  
一世而夢陽尤甚吳人黃省曾越人周祚千里致書願  
爲弟子迨嘉靖朝李攀龍王世貞出復奉以爲宗天下  
推李何王李爲四大家無不爭效其體華州王維禎以  
爲七言律自杜甫以後善用頓挫倒插之法惟夢陽一

人而後有譏夢陽詩文者則謂其模擬剽竊得史遷少  
陵之似而失其真云康海字德涵武功人弘治十五年  
殿試第一授修撰與夢陽輩相倡和訾議諸先達忌者  
頗衆正德初劉瑾亂政以海同鄉慕其才欲招致之海  
不肯往會夢陽下獄書片紙招海曰對山救我對山者  
海別號也海乃謁瑾瑾大喜爲創屣迎海因設詭辭說  
之瑾意解明日釋夢陽踰年瑾敗海坐黨落職王九思  
字敬夫鄆人弘治九年進士由庶吉士授檢討尋調吏  
部至郎中亦以瑾黨謫壽州同知復被論勒致仕海九  
思同里同官同以瑾黨廢每相聚沂東鄆杜間挾聲伎

明史卷一百一十六 列傳 三  
酣飲製樂造歌曲自比俳優以寄其怫鬱九思嘗費重  
貲購樂工學琵琶海搗彈尤善後人傳相倣效大雅之  
道微矣王維禎字允寧嘉靖十四年進士擢庶吉士累  
官南京國子祭酒家居地大震壓死維禎頎而哲自負  
經世才職文墨不得少效於世使酒謾罵人多畏而遠  
之於文好司馬遷於詩好杜甫而其意以夢陽兼此二  
人終身所服膺效法者夢陽也

何景明字仲默信陽人八歲能詩古文弘治十一年舉  
於鄉年方十五宗藩貴人爭遣人負視所至聚觀若堵  
十五年第進士授中書舍人與李夢陽輩倡詩古文夢  
陽最雄駿景明稍後出相與頎頎正德改元劉瑾竊柄  
上書吏部尚書許進勸其秉政毋撓語極激烈已遂謝  
病歸踰年瑾盡免諸在告者官景明坐罷瑾誅用李東  
陽薦起故秩直內閣制敕房李夢陽下獄衆莫敢爲直  
景明上書吏部尚書楊一清救之九年乾清宮災疏言  
義子不當畜邊軍不當留番僧不當寵宦官不當任留  
中久之進吏部員外郎直制敕如故錢寧欲交驩以古  
畫索題景明曰此名筆母汚人手留經年終擲還之尋  
擢陝西提學副使廖鵬弟太監鑾鎮關中橫甚諸參隨  
遇三司不下馬景明執撻之其教諸生專以經術世務



遜秀者於正學書院親爲說經不用諸家訓詁士始知  
有經學嘉靖初引疾歸未幾卒年三十有九景明志操  
耿介尚節義鄙榮利與夢陽竝有國士風兩人爲詩文  
初相得甚歡名成之後互相詆譏夢陽主摹倣景明則  
主剗造各樹堅壘不相下兩人交游亦遂分左右袒說  
者謂景明之才本遜夢陽而其詩秀逸穩稱視夢陽反  
爲過之然天下語詩文必竝稱何李又與邊貢徐禎卿  
竝稱四傑其持論謂詩溺於陶謝力振之古詩之法亡  
於謝文靡於隋韓力振之古文之法亡於韓錢謙益撰  
列朝詩力詆之

明和翻刻本持作持

徐禎卿字昌穀吳縣人資穎持家不蓄一書而無所不  
通自爲諸生已工詩歌與里人唐寅善寅言之沈周楊  
循吉由是知名舉弘治十八年進士孝宗遣中使問禎  
卿與華亭陸深名深遂得館選而禎卿以貌寢不與授  
大理左寺副坐失囚貶國子博士禎卿少與祝允明唐  
寅文徵明齊名號吳中四才子其爲詩喜白居易劉禹  
錫既登第與李夢陽何景明游悔其少作改而趨漢魏  
盛唐然故習猶在夢陽譏其守而未化卒年二十有三  
禎卿體癯神清詩鎔鍊精警爲吳中詩人之冠年雖不  
永名滿士林子伯虬舉人亦能詩楊循吉字君謙吳縣

遜秀者於正學書院親爲說經不用諸家訓詁士始知有經學嘉靖初引疾歸未幾卒年三十有九景明志操耿介尚節義鄙榮利與夢陽竝有國士風兩人爲詩文初相得甚歡名成之後互相詆譏夢陽主摹倣景明則主剗造各樹堅壘不相下兩人交游亦遂分左右袒說者謂景明之才本遜夢陽而其詩秀逸穩稱視夢陽反爲過之然天下語詩文必竝稱何李又與邊貢徐禎卿竝稱四傑其持論謂詩溺於陶謝力振之古詩之法亡於謝文靡於隋韓力振之古文之法亡於韓錢謙益撰列朝詩力詆之

徐禎卿字昌穀吳縣人資穎持家不蓄一書而無所不通自爲諸生已工詩歌與里人唐寅善寅言之沈周楊循吉由是知名舉弘治十八年進士孝宗遣中使問禎卿與華亭陸深名深遂得館選而禎卿以貌寢不與授大理左寺副坐失囚貶國子博士禎卿少與祝允明唐寅文徵明齊名號吳中四才子其爲詩喜白居易劉禹錫旣登第與李夢陽何景明游悔其少作改而趨漢魏盛唐然故習猶在夢陽譏其守而未化卒年二十有三禎卿體癯神清詩鎔鍊精警爲吳中詩人之冠年雖不永名滿士林子伯虬舉人亦能詩楊循吉字君謙吳縣

人成化二十年進士授禮部主事善病好讀書每得意手足蹕掉不能自禁用是得顛主事名一歲中數移病不出弘治初奏乞改教不許遂請致仕歸年纔三十有一結廬支硎山下課讀經史旁通內典稗官父母歿傾貲治葬寢苦墓側性狷隘好持人短長又好以學問窮人至頰赤不顧清寧宮災詔求直言馳疏請復建文帝尊號格不行武宗駐蹕南都召賦打虎曲稱旨易武人裝日侍御前爲樂府小令帝以優俳畜之不授官循吉以爲恥闕九月辭歸旣復召至京會帝崩乃還嘉靖中獻九廟頌及華陽求嗣齋儀報聞而已晚歲落實益堅

癖自好尚書顧璘道吳以幣贊促膝論文歡甚俄郡守邀璘璘將赴之循吉忽色變驅之出擲還其幣明日璘往謝閉門不納卒年八十九其詩文自定爲松籌堂集他所作又十餘種幾及千卷祝允明字希哲長洲人祖顯正統四年進士內侍傳旨試能文者四人顯與焉入掖門知欲令教小內豎也不試而出由給事中歷山西參政並有聲允明以弘治五年舉於鄉久之不第授廣東興寧知縣捕戮盜魁三十餘邑以無警稍遷應天通判謝病歸嘉靖五年卒允明生而枝指故自號枝山又號枝指生五歲作徑尺字九歲能詩稍長博覽羣集文

明倫彙編 家範典 第... 卷...  
章有奇氣當筵疾書思若湧泉尤工書法名動海內好  
酒色六博善新聲求文及書者踵至多賄妓掩得之惡  
禮法士亦不問生產有所入輒召客豪飲費盡乃已或  
分與持去不留一錢晚益困每出追呼索逋者相隨於  
後允明益自喜所著有詩文集六十卷他雜著百餘卷  
子續正德中進士仕至廣西左布政使唐寅字伯虎一  
字子畏性穎利與里狂生張靈縱酒不事諸生業祝允  
明規之乃閉戶浹歲舉弘治十一年鄉試第一座主梁  
儲奇其文還朝示學士程敏政敏政亦奇之未幾敏政  
總裁會試江陰富人徐經賄其家僮得試題事露言者

劾敏政語連寅下詔獄謫爲吏寅恥不就歸家益放浪  
寧王宸濠厚幣聘之寅察其有異志佯狂使酒露其醜  
穢宸濠不能堪放還築室桃花塢與客日般飲其中年  
五十四而卒寅詩文初尚才情晚年頽然自放謂後人  
知我不在此論者傷之吳中自枝山輩以放誕不羈爲  
世所指目而文才輕豔傾動流輩傳說者增益而附麗  
之往往出名教外時常熟有桑悅者字民懌尤怪妄亦  
以才名吳中書過目輒焚棄曰已在吾腹中矣敢爲大  
言以孟子自况或問翰林文章曰虛無人舉天下惟悅  
其次祝允明又次羅玘爲諸生上謁監司曰江南才子

監司大駭延之較書預刊落以試悅文義不屬者索筆  
補之年十九舉成化元年鄉試試春官答策語不雅馴  
被斥三試得副榜年二十餘耳年籍誤二爲六遂除秦  
和訓導學士邱濬重其文屬學使者善遇之使者至問  
悅不迎豈有恙乎長吏皆銜之曰無恙自負才名不肯  
謁耳使者遣吏召不至益兩使促之悅怒曰始吾謂天  
下未有無耳者乃今有之與若期三日後來瀆則不來  
矣使者恚欲收悅緣濬故不果三日來見長揖使者使  
者怒悅脫帽竟去使者下階謝乃已遷長沙通判調柳  
州會外艱歸遂不出居家益狂誕鄉人莫不重其文而

駭其行初悅在京師見高麗使臣市本朝兩都賦無有  
以爲恥遂賦之居長沙著庸言自以爲窮究天人之際  
所著書頗行於世潛言詩頌之正時董顯刻工且數南  
邊貢字廷實歷城人祖寧應天治中父節代州知州貢  
年二十舉於鄉第弘治九年進士除太常博士擢兵科  
給事中孝宗崩疏劾中官張瑜太醫劉文泰高廷和用  
藥之謬又劾中官苗達保國公朱暉都御史史琳用兵  
之失改太常丞遷衛輝知府改荊州竝能其官歷陝西  
河南提學副使以母憂家居嘉靖改元用薦起南京太  
常少卿三遷太常卿督四夷館擢刑部右侍郎拜戶部

尚書竝在南京貢早負才名美風姿所交悉海內名士  
久官留都優閒無事游覽江山揮毫浮白夜以繼日都  
御史劾其縱酒廢職遂罷歸  
顧璘字華玉上元人弘治九年進士授廣平知縣擢南  
京吏部主事晉郎中正德四年出爲開封知府數與鎮  
守太監廖堂王宏忤逮下錦衣獄謫全州知州秩滿遷  
台州知府歷浙江左布政使山西湖廣巡撫右副都御  
史所至有聲遷吏部右侍郎改工部董顯陵工畢遷南  
京刑部尚書罷歸年七十餘卒璘少負才名與何李相  
上下虛己好士知恐不及在浙慕孫太初一元不可得

見道衣幅巾放舟湖上月下見小舟泊斷橋一僧一鶴  
一童子煮茗笑曰此必太初也移舟就之遂往還無間  
撫湖廣時愛王廷陳才欲見之廷陳不可偵廷陳狎游  
疾掩之廷陳避不得遂定交旣歸構息園大治幸舍居  
客客常滿從弟璵字英玉以河南副使歸居園側一小  
樓教授自給璘時時與客豪飲伎樂雜作呼璵璵終不  
赴其孤介如此初璘與同里陳沂王韋號金陵三俊其  
後寶應朱應登繼起稱四大家璘詩矩矱唐人以風調  
勝韋婉麗多致頗失纖弱沂與韋同調應登才思泉湧  
落筆千言然璘應登羽翼李夢陽而韋沂則頗持異論

三人者仕宦皆不及璘陳沂字魯南正德中進士由庶  
吉士歷編修侍講出爲江西參議量移山東參政以不  
附張孚敬桂萼改行太僕卿致仕王章字欽佩文徽成  
化時給事中直諫有聲章舉弘治中進士由庶吉士歷  
官太僕少卿子逢元亦能詩先應登字升之弘治中進  
士歷雲南提學副使遷參政恃才傲物中飛語罷歸子  
曰藩嘉精門進士終九江知府能文章世其家南都自  
洪永初風雅未暢徐霖陳鐸金琮謝璿輩談藝正德時  
稍稍振起自璘主詞壇士大夫希風附塵厥道大彰許  
穀陳鳳璿子少南金大車大輿金鑾盛時泰陳芹之屬

竝從之游穀等皆里人鑾僑居客也儀真蔣山鄉江都  
趙鶴亦與璘遙相應和沿及未造風流未歇云  
鄭善夫字繼之閩縣人弘治十八年進士連遭內外艱  
止德六年始爲戶部主事權稅許墅以清操聞時劉瑾  
雖誅嬖倖用事善夫憤之乃告歸築草堂金鼇峰下爲  
遲清亭讀書其中曰俟天下之清也寡交游日晏未炊  
欣然自得起禮部主事進員外郎武宗將南巡偕同列  
切諫杖於廷罰跪五日善夫更爲疏草置懷中屬其僕  
曰死卽上之幸不死歎曰時事若此尚可覩顏就列哉  
乞歸未得明年力請乃得歸嘉靖改元用薦起南京刑

部郎中未上改吏部行抵建寧便道游武夷九曲風雪  
絕糧得病卒年三十有九善夫敦行誼婚嫁七弟妹皆  
悉推予之葬母黨二十二人所交盡名士與孫一元殷  
雲霄方豪尤友善作詩力摹少陵雲霄字近夫壽張人  
善夫同年進士作蓄艾堂聚書數千卷以作者自命正  
德中官南京給事中武宗納有娠女子馬姬宮中雲霄  
偕同官疏諫引李園呂不韋事爲諷不報卒官年三十  
有七鄉人穆孔暉畏雲霄峭直曰殷子恥不善不啻負  
穢然方豪字思道開化人正德三年進士除崑山知縣  
遷刑部主事諫武宗南巡跪闕下五日復受杖歷官湖

廣副使罷歸一元見隱逸傳閩中詩文自林鴻高棟後  
闕百餘年善夫繼之迨萬曆中年曹學佺徐勳輩繼起  
謝肇淛鄧原岳和之風雅復振焉學佺詳見後傳勳字  
興公閩縣人兄燧萬曆間舉人勳以布衣終博聞多識  
善草隸書積書齋峰書舍至數萬卷肇淛字在杭萬曆  
三十年進士官工部郎中視河張秋作北河紀略具載  
河流原委及歷代治河利病終廣西右布政使原岳字  
汝高亦閩縣人肇淛同年進士終湖廣副使  
陸深字子淵上海人弘治十八年進士二甲第一選庶  
吉士授編修劉瑾嫉翰林官亢已悉改外深得南京主



事瑾誅復職歷國子司業祭酒充經筵講官奏講官撰  
進講章閣臣不宜改竄忤輔臣謫延平同知晉山西提  
學副使改浙江累官四川左布政使松茂諸番亂深主  
調兵食有功賜金幣嘉靖十六年召爲太常卿兼侍讀  
學士世宗南巡深掌行在翰林院印御筆刪侍讀二字  
進詹事府詹事致仕卒諡文裕深少與徐禎卿相切磨  
爲文章有名工書倣李邕趙孟頫賞鑒博雅爲詞臣冠  
然頗倨傲人以此少之同邑有王圻者字元翰嘉靖四  
十四年進士除清江知縣調萬安擢御史忤時相出爲  
福建按察僉事謫印州判官兩知進賢曹縣遷開州知

州歷官陝西布政參議乞養歸築室淞江之濱種梅萬  
樹目曰梅花源以著書爲事年踰耄耋猶篝燈帳中丙  
夜不輟所撰續文獻通考諸書行世初圻以奏議爲趙  
貞吉所推張居正與貞吉交惡諷圻攻之不應高拱爲  
圻座主時方修隙徐階又以圻爲私其鄉人不助已不  
能無恚遂撫拾之  
王廷陳字穉欽黃岡人父濟吏部郎中廷陳穎慧絕人  
幼好弄父扶之輒大呼曰大人奈何虐天下名士正德  
十二年成進士選庶吉士每恃才放恣故事兩學士爲  
館師體嚴重廷陳伺其退食獨上樹杪大聲叫呼兩學

明史卷一百一十一 列傳 三十一  
士無如之何佯弗聞也武宗下詔南巡與同館舒芬等  
七人將疏諫館師石瑄力止之廷陳賦烏母謠大書於  
壁以刺瑄及執政皆不悅已而疏上帝怒罰跪五日杖  
於廷時已改吏科給事中乃出爲裕州知州廷陳不習  
爲吏又失職怨望簿牒堆案漫不省視夏日裸跣坐堂  
皇見飛鳥集庭樹輒止訟者取彈彈之上官行部不出  
迎已而布政使陳鳳梧及巡按御史喻茂堅先後至廷  
陳以鳳梧座主特出迓鳳梧好謂曰子候我固善御史  
卽來候之當倍謹廷陳許諾及茂堅至銜其素驕蹇有  
意裁抑之以小過榜州吏廷陳爲跪請茂堅故益甚廷

陳大罵曰陳公誤我直上堂搏茂堅悉呼吏卒出鎖其  
門禁絕供億且將具奏茂堅大窘鳳梧爲解乃夜馳去  
尋上疏劾之適裕人被案者逸出奏廷陳不法事收捕  
繫獄削籍歸世宗踐阼前直諫被謫者悉復官獨廷陳  
以望吏議不與屏居二十餘年嗜酒縱倡樂益自放廢  
士大夫造謁多蓬髮赤足不具賓主禮時衣紅紫窄袖  
衫騎牛跨馬嘯歌田野間嘉靖十八年詔修承天大志  
巡撫顧璘以廷陳及顏木王格薦書成不稱旨賜銀幣  
而已廷陳才高詩文重當世一時才士鮮能過之木應  
山人官亳州知州格京山人官河南僉事

李濂字川父祥符人舉正德八年鄉試第一明年成進士授沔陽知州稍遷寧波同知擢山西僉事嘉靖五年以大計免歸年纔三十有八濂少負俊才時從俠少年聯騎出城搏獸射雉酒酣悲歌慨然慕信陵君侯生之為人一日作理情賦友人左國幾持以示李夢陽夢陽大嗟賞訪之吹臺濂自此聲馳河雒間既罷歸益肆力於學遂以古文名於時初受知夢陽後不屑附和里居四十餘年著述甚富

明史卷二百八十六終

明史卷二百八十七

列傳第一百七十五

救修

總裁官總理事務 經筵講官保兼李太保和殿大學士兼詹事府尚書加六級張廷玉等奉

文苑三

文徵明 蔡羽等

黃佐 歐大任 黎民表

柯維騏

王慎中 屠應埈等

高叔嗣 蔡汝楠

陳東 任瀚 熊過 李開先

田汝成 子藝衡

皇甫湜 弟冲 瀆 弟汭

茅坤 子維

謝榛 盧構

李攀龍 梁有譽等

王世貞 汪道昆 弟世懋 胡應麟

歸有光

子子慕  
胡友信

文徵明長洲人初名璧以字行更字徵仲別號衡山父林溫州知府叔父森右僉都御史林卒吏民醵千金爲賻徵明年十六悉却之吏民修故却金亭以配前守何文淵而記其事徵明幼不慧稍長穎異挺發學文於吳寬學書於李應楨學畫於沈周皆父友也又與祝允明唐寅徐禎卿輩相切劘名日益著其爲人和而介巡撫俞諫欲遺之金指所衣藍衫謂曰敝至此邪徵明佯不喻曰遭雨敝耳諫竟不敢言遺金事寧王宸濠慕其名貽書幣聘之辭病不赴正德末巡撫李充嗣薦之會徵

明亦以歲貢生詣吏部試奏授翰林院待詔世宗立預修武宗實錄侍經筵歲時頒賜與諸詞臣齒而是時專尚科目徵明意不自得連歲乞歸先是林知溫州識張璁諸生中璁旣得勢諷徵明附之辭不就楊一清召入輔政徵明見獨後一清亟謂曰子不知乃翁與我友邪徵明正色曰先君棄不肖三十餘年苟以一字及者弗敢忘實不知相公與先君友也一清有慚色尋與璁謀欲徙徵明官徵明乞歸益力乃獲致仕四方乞詩文書畫者接踵於道而富貴人不易得片楮尤不肯與王府及中人曰此法所禁也周徽諸王以寶玩爲贈不啓封

而還之外國使者道吳門望里肅拜以不獲見爲恨文  
筆徧天下門下士屢作者頗多徵明亦不禁嘉靖三十  
八年卒年九十矣長子彭字壽承國子博士次子嘉字  
休承和州學正並能詩工書畫篆刻世其家彭孫震孟  
自有傳吳中自吳寬王鏊以文章領袖館閣一時名士  
沈周祝允明輩與並馳騁文風極盛徵明及蔡羽黃省  
曾袁表皇甫冲兄弟稍後出而徵明主風雅數十年與  
之遊者王寵陸師道陳道復王穀祥彭年周天球錢穀  
之屬亦皆以詞翰名於世蔡羽字九遠由國子生授南  
京翰林院孔目自號林屋山人有林屋南館二集自負

甚高文法先秦兩漢或謂其詩似李賀羽曰吾詩求出  
魏晉上今乃爲李賀邪其不肯屈抑如此黃省曾字勉  
之舉鄉試從王守仁湛若水游又學詩於李夢陽所著  
有五嶽山人集子姬水字淳父有文名學書於祝允明  
袁表字永之七歲能詩舉嘉靖五年進士改庶吉士張  
璠惡之出爲刑部主事累遷廣西提學僉事兩廣自韓  
雍後監司謁督府率庭跪表獨長揖無何謝病歸子曾  
尼字魯望亦官山東提學副使有文名王寵字履吉別  
號雅宜少學於蔡羽居林屋者二年旣而讀書石湖由  
諸生貢入國子僅四十而卒行楷得晉法書無所不觀

陸師道字子傳由進士授工部主事改禮部以養母請告歸歸而游徵明門稱弟子家居十四年乃復起累官尚寶少卿善詩文工小楷古篆繪事人謂徵明四絕不減趙孟頫而師道並傳之其風尚亦畧相似平居不妄交游長吏罕識其面女字卿子適趙宦光夫婦皆有聞於時陳道復名淳以字行祖璠副都御史淳受業徵明以文行著善書畫自號白陽山人王穀祥字祿之由進士改庶吉士歷官吏部員外郎忤尚書汪鋐左遷真定通判以歸與師道俱有清望彭年字孔嘉其人亦長者周太球字公瑕錢穀字叔寶天球以書穀以畫皆繼徵

明表表吳中者也其後華亭何良俊亦以歲貢生入國學當路知其名用蔡羽例特授南京翰林院孔目良俊字元朗少篤學二十年不下樓與弟良傅並負俊才良傅舉進士官南京禮部郎中而良俊猶滯場屋與上海張之象同里徐獻忠董宜陽友善並有聲及官南京趙貞吉王維楨相繼掌院事與相得甚歡良俊居久之慨然歎曰吾有清森閣在海上藏書四萬卷名畫百籤古法帖彝鼎數十種棄此不居而僕僕牛馬走乎遂移疾歸海上中倭復居金陵者數年更買宅居吳閭年七十始返故里徐獻忠字伯臣嘉靖中舉於鄉官奉化知縣

著書數百卷卒年七十七王世貞私諡曰貞憲董宜陽字子元張之象字月鹿祖萱湖廣參議父鳴謙順天通判之象由諸生入國學授浙江按察司知事以吏隱自命歸益務撰著晚居秀林山罕入城市卒年八十一黃佐字才伯香山人祖瑜長樂知縣以學行聞正德中佐舉鄉試第一世宗嗣位始成進士選庶吉士嘉靖初授編修陳初政要務又請修舉新政疏皆留中尋省親歸便道謁王守仁與論知行合一之旨數相辨難守仁亦稱其直諒還朝會出諸翰林爲外僚除江西僉事旋改督廣西學校聞母病引疾乞休不俟報竟去下巡撫

林富逮問富言佐誠有罪第爲親受過於情可原乃令致仕家居九年簡宮僚命以編修兼司諫尋進侍讀掌南京翰林院召爲右諭德擢南京國子祭酒母憂除服起少詹事謁大學士夏言與論河套事不合會吏部缺左侍郎所司推禮部右侍郎崔桐及佐給事中徐霖御史艾朴言桐與左侍郎許成名競進至相詬詈而佐及同官王用賓亦爭覬望惟恐或先之宜皆止勿用言從中主之遂皆賜罷佐學以程朱爲宗惟理氣之說獨持一論平生撰述至二百六十餘卷所著樂典自謂洩造化之秘年七十七卒穆宗詔贈禮部右侍郎諡文裕佐

弟子多以行業自飭而梁有譽歐大任黎民表詩名最著云歐大任字楨伯順德人由歲貢生歷官南京工部郎中年八十而終黎民表字惟敬從化人御史貫子也舉鄉試久不第授翰林孔目遷吏部司務執政知其能文用爲制敕房中書供事內閣加官至參議

柯維騏字奇純莆田人高祖潛翰林學士父英徽州知府維騏舉嘉靖二年進士授南京戶部主事未赴輒引疾歸張孚敬用事勅新制京朝官病滿三年者槩罷免維騏亦在罷中自是謝賓客專心讀書久之門人日進先後四百餘人維騏引掖靡倦慨近世學者樂徑易而

憚積累竊二氏之說以文其固陋也作左右二銘訓學者務實以辨心術端趨向爲實志以存敬畏密操履爲實功而其極則以宰理人物成能天地爲實用作講義二卷宋史與遼金二史舊分三書維騏乃合之爲一以遼金附之而列二王於本紀褒貶去取義例嚴整閱二十年而始成名之曰宋史新編又著史記考要續莆陽文獻志及所作詩文集並行於世維騏登第五十載未嘗一日服官中更倭亂故廬焚燬家困甚終不妄取世味無所嗜惟嗜讀書撫按監司時有論薦不復起隆慶初廷臣復薦所司以維騏年高但授承德郎致仕卒年



七十有八孫茂竹海陽知縣茂竹子昶副都御史巡撫  
山西

王慎中字道思晉江人四歲能誦詩十八舉嘉靖五年  
進士授戶部主事尋改禮部祠祭司時四方名士唐順  
之陳柬李開先趙時春任瀚熊過屠應垓華察陸銓江  
以達曾汴輩咸在部曹慎中與之講習學大進十二年  
詔簡部郎爲翰林衆首擬慎中大學士張孚敬欲一見  
辭不赴乃稍移吏部爲考功員外郎進驗封郎中忌者  
讒之孚敬因覆議真人張衍慶請封疏謫常州通判稍  
遷戶部主事禮部員外郎並在南京久之擢山東提學

僉事改江西參議進河南參政侍郎王杲奉命振荒以  
其事委慎中還朝薦慎中可重用會二十年大計吏部  
註慎中不及而大學士夏言先嘗爲禮部尚書慎中其  
屬吏也與相忤遂內批不謹落其職慎中爲文初主秦  
漢謂東京下無可取已悟歐曾作文之法乃盡焚舊作  
一意師倣尤得力於曾鞏順之初不服久亦變而從之  
壯年廢棄益肆力古文演迤詳贍卓然成家與順之齊  
名天下稱之曰王唐又曰晉江毘陵家居問業者踵至  
年五十一而終李攀龍王世貞後起力排之卒不能掩  
攀龍慎中提學山東時所賞拔者也慎中初號遵巖居

士後號南江屠應垓字文升平湖人刑部尚書勳子也  
舉嘉靖五年進士由郎中改翰林官至右諭德華察字  
子潛無錫人應垓同年進士累官侍講學士掌南京翰  
林院陸銓字選之鄞人嘉靖二年進士與弟偏修銓爭  
大禮並繫詔獄被杖後官廣西布政使銓終山東提學  
副使兄弟皆能文江以達字子順貴溪人嘉靖五年進  
士累官福建提學僉事  
高叔嗣字子業祥符人年十六作申請賦幾萬言見者  
驚異十八舉於鄉第嘉靖二年進士授工部主事改吏  
部歷稽勲郎中出爲山西左參政斷疑獄十二事人稱

爲神遷湖廣按察使卒官年三十有七叔嗣少受知邑  
人李夢陽及官吏部與三原馬理武城王道同署以文  
藝相磨切其爲詩清新婉約雖爲夢陽所知不宗其說  
陳束序其蘇門集謂有應物之中澹兼曲江之沈雄體  
王孟之清適具高岑之悲壯王世貞則曰子業詩如高  
山鼓琴沈思忽往木葉盡脫石氣自青又如衛洗馬言  
愁憔悴婉篤令人心折而蔡汝楠至推爲本朝第一云  
兄仲嗣官知府亦有才名汝楠字子木兒時隨父南京  
聽祭酒湛若水講學輒有解悟年十八成嘉靖十一年  
進士授行人從王慎中唐順之及叔嗣輩學爲詩尋進

刑部員外郎徙南京刑部善皇甫淳兄弟尚書顯璘引  
爲忘年友廷議改歸德州爲府擢汝楠知其府事以母  
憂歸聚諸生石鼓書院與說經治民有惠政旣去士民  
祠祀之歷官江西左右布政使擢右副都御史巡撫河  
南召爲兵部右侍郎從諸大僚祝釐西宮世宗望見其  
貌寢改南京工部右侍郎未幾卒汝楠始好爲詩有重  
名中年好經學及官江西與鄒守一羅洪先游學益進  
然詩由此不工云

陳束字約之鄞人生而聰慧絕倫好讀書會稽侍郎  
董玘官翰林時聞束才召視之束垂髫而前試詞賦立  
就遂字以女攜至京文譽益起嘉靖八年廷對世宗親  
擢羅洪先程文德楊名爲一甲而置唐順之及束任瀚  
於二甲皆手批其卷無何考庶吉士得胡經等二十人  
以束及順之瀚曾奉御批列經等首座主張璫霍韜以  
前此館選悉改他曹引嫌亦議改乃寢前命束授禮部  
主事時有嘉靖八才子之稱謂束及王慎中唐順之趙  
時春熊過任瀚李開先呂高也四郊改建都御史汪鋹  
請徙近郊居民墳墓束疏諫不報遷員外郎改編修束  
出璫韜門不肯親附歲時上壽望門投刺輒馳馬過之  
爲所惡出爲湖廣僉事分巡辰沅治有聲稍遷福建參

議改河南提學副使東故有嘔血疾會科試期迫試八  
郡之士三月而畢疾增劇竟不起年纔二十有三妻董  
亦能詩東卒未幾亦卒東竟無後當嘉靖初稱詩者多  
宗何李東與順之輩厭而矯之東早世且藁多散逸今  
所傳后岡集僅十之一二云任瀚字少海南充人嘉靖  
八年進士改庶吉士未上授吏部主事屢遷考功郎中  
十八年簡宮僚改左春坊左司直兼翰林院檢討明年  
拜疏引疾出郭戒行疏再上不報復自引還給事中周  
來勃瀚舉動任情蔑視官守帝令自陳瀚語侵掌詹事  
霍韜帝怒勒爲民久之遇赦復官致仕終世宗朝中外

禮薦不復用神宗嗣位四川巡撫劉思潔曾省吾先後  
疏薦優旨報聞而已瀚少懷用世志百家二氏之書罔  
不蒐討被廢益反求六經闡明聖學晚又潛心於易深  
有所得文亦高簡卒年九十三熊過字叔仁富順人瀚  
同年進士累官祠祭郎中坐事貶秩復除名爲民李開  
先字伯華章邱人東同年進士官至太常少卿性好蓄  
書李氏藏書之名聞天下呂高字山甫丹徒人亦東同  
年進士歷官山東提學副使鄉試錄文舊多出學使者  
手巡按御史葉經乞順之文高心憾寓書京師友人言  
經糺繆嚴嵩惡經遂置之死及後大計諸御史謂經禍

由高乃斥歸於八子中名最下

田汝成字叔禾錢塘人嘉靖五年進士授南京刑部主事尋召改禮部十年十二月上言陛下以青宮久虛祈天建醮復普放生之仁凡羈蹄鍛羽禁在上林者咸獲縱釋顧使囹圄之徒久纏徽纆衣冠之侶流竄窮荒父子長離魂魄永喪此獨非陛下之赤子乎望大廣皇仁悉加寬宥忤旨切責停俸二月屢遷祠祭郎中廣東僉事謫知滁州復擢貴州僉事改廣西右叅議分守右江龍州土酋趙楷憑祥州土酋李寰皆弒主自立與副使翁萬達密討誅之努灘賊侯公丁爲亂斷藤峽羣賊與

相應汝成復偕萬達設策誘禽公丁而進兵討峽賊大破之又與萬達建善後七事一方遂靖有銀幣之賜遷福建提學副使歲當大比預定諸生甲乙比榜發一如所定汝成博學工古文尤善敘述歷官西南諳曉先朝遺事撰炎微紀聞歸田後盤桓湖山窮浙西諸名勝撰西湖游覽志並見稱於時他所論著甚多時推其博洽子藝蘅字子執十歲從父過采石賦詩有警句性放誕不羈嗜酒任俠以歲貢生爲徽州訓導罷歸作詩有才調爲人所稱

皇甫濬字子安長洲人父錄弘治九年進士任重慶知

府生四子冲、濬、汭、瀋。同登嘉靖七年鄉薦。明年汭第進士。又三年濬第進士。又十三年瀋亦第進士。而冲尚爲舉子。兄弟並好學。工詩。稱皇甫四傑。冲字子浚。善騎射。好談兵。遇南北內訌。撰幾策。兵統枕戈。襍言三書。凡數十萬言。濬初授工部主事。改禮部。歷儀制員外郎。主客郎中。在儀制時。夏言爲尚書。連疏請建儲。皆濬起草。故言深知濬才。比簡宮僚。遂用爲春坊司直兼翰林檢討。言者論濬改官。有私謫。廣平通判量移南京刑部主事。進員外郎。遷浙江僉事。大計京官。以南曹事論罷。邑邑發病卒。濬沈靜寡與。自負高俊。稍不當意。終日相

對無一言。居官砥廉。偶然頗操切。多忤物。故數被讒謗。云汭字子循。七歲能詩。官工部主事。名動公卿。沾沾自喜。用是貶秩。爲黃州推官。屢遷南京稽勲郎中。再貶開州同知。量移處州府同知。擢雲南僉事。以計典論黜。汭和易近聲色。好狎游於兄弟中。最老壽。年八十乃卒。瀋字子約。初授工部主事。母喪除起。故官典惜薪。厥賈人僞增數罔利。瀋按其罪。賈人女爲尚書文明妾。明召瀋切責之。瀋抗言曰。公掌邦政。縱奸人干紀。又欲奪郎官法守邪。明爲斂容謝。大計謫河南布政司理問。終興化同知。濬兄弟與黃曾。曾省曾爲中表兄弟。文藻亦相似。

其後里人張鳳翼燕翼獻翼並負才名吳人語曰前有  
四皇後有三張鳳翼燕翼終舉人而獻翼爲太學生名  
日益高年老矣狂甚爲讐家所殺

茅坤字順甫歸安人嘉靖十七年進士歷知青陽丹徒  
二縣母憂服闋遷禮部主事移吏部稽勲司坐累謫廣  
平通判屢遷廣西兵備僉事轄府江道坤雅好談兵猺  
賊據鬼子諸砦殺陽朔令朝議大征總督應價以問坤  
坤曰大征非兵十萬不可餉稱之今猝不能集而賊已  
據險爲備計莫若鵬勦倭入殲其魁他部必讐謀自全  
此便計也價善之悉以兵事委坤連破十七砦晉秩二

等民立祠祀之遷大名兵備副使總督楊博歎爲奇才  
特薦於朝爲忌者所中道論其先任貪污狀落職歸時  
倭事方急胡宗憲延之幕中與籌軍事奏請爲福建副  
使吏部持之乃已家人橫於里爲巡按龐尚鵬所劾遂  
褫冠帶坤旣廢用心計治生家大起今九十卒於萬曆  
二十九年坤善古文最心折唐順之順之嘗言宋諸大  
家文所著文編唐宋人自韓柳歐三蘇曾王八家無  
所取故坤選八大家文鈔其書盛行海內鄉里小生無  
不知茅鹿門者鹿門坤別號也少子維字孝若能詩與  
同郡臧懋循吳稼澄吳夢陽並稱四子嘗詣闕上書希

得召見陳當世大事不報

謝榛字茂秦臨清人眇一目年十六作樂府商調少年爭歌之已折節讀書刻意爲歌詩西游彰德爲趙康王所賓禮入京師脫盧柎於獄李攀龍王世貞輩結詩社榛爲長攀龍次之及攀龍名大熾榛與論生平頗相鑄責攀龍遂貽書絕交世貞輩右攀龍力相排擠削其名於七子之列然榛游道日廣秦晉諸王爭延致大河南北皆稱謝榛先生趙康王卒榛乃歸萬曆元年冬復游彰德王曾孫穆王亦賓禮之酒闌樂止命所愛買姬獨奏琵琶則榛所製竹枝詞也榛方傾聽王命姬出拜光

華射人藉地而坐竟十章榛曰此山人里言耳請更製以備房中之奏詰朝上新詞十四闕姬悉按而譜之明年元旦便殿奏伎酒止送客卽盛禮而歸姬於榛榛游燕趙間至大名客請賦壽詩百章成八十餘首投筆而逝當七子結社之始尚論有唐諸家各有所重榛曰取李杜十四家最勝者熟讀之以會神氣歌詠之以求聲調玩味之以裒精華得此三要則浩乎渾淪不必塑謫仙而畫少陵也諸人心師其言厥後雖合力擯榛其稱詩指要實自榛發也盧柎字少楨濬縣人家素封輸貲爲國學生博聞強記落筆數千言爲人踞弛好使酒罵



座常爲具召邑令日晏不至桡大怒徹席滅炬而臥令  
至桡已大醉不具賓主禮會桡役夫被榜他日牆壓死  
令卽捕桡論死繫獄破其家里中兒爲獄卒恨桡笞之  
數百謀以土囊壓殺之爲他卒救解桡居獄中益讀所  
攜書作幽鞠放招二賦詞旨沈鬱謝榛入京師見諸貴  
人泣訴其冤狀曰生有一盧桡不能救乃從千古哀沅  
而弔湘乎平湖陸光祖選得濬令因榛言平反其獄桡  
出走謁榛榛方客趙康王所王立召見桡禮爲上賓諸  
宗人以王故爭容桡桡酒酣罵座如故及光祖爲南京  
禮部郎桡往訪之徧游吳會無所遇還益落魄嗜酒病

三日卒桡騷賦最爲王世貞所稱詩亦豪放如其爲人  
李攀龍字于鱗歷城人九歲而孤家貧自奮於學稍長  
爲諸生與友人許邦才殷士儋學爲詩歌已益厭訓詁  
學日讀古書里人共目爲狂生舉嘉靖二十三年進士  
授刑部主事歷員外郎郎中稍遷順德知府有善政上  
官交薦擢陝西提學副使鄉人殷學爲巡撫檄令屬文  
攀龍怫然曰文可檄致邪拒不應會其地數震攀龍心  
悸念母思歸遂謫病故事外官謝病不再起吏部重其  
才用何景明例特予告歸予告者例得再起攀龍旣歸  
構白雪樓名日益高賓客造門率謝不見大吏至亦然

以是得簡傲聲獨故交殷許輩過從靡間時徐中行亦家居坐客恒滿二人間之交相得也歸田將十年隆慶改元薦起浙江副使改參政擢河南按察使攀龍至是摧亢爲和賓客亦稍稍進無何奔母喪歸哀毀得疾疾少間一日心痛卒攀龍之始官刑曹也與濮州李先芳臨清謝榛孝豐吳維岳輩倡詩社王世貞初釋褐先芳引入社遂與攀龍定交明年先芳出爲外吏又二年宗臣梁有譽入是爲五子未幾徐中行與國倫亦至乃改稱七子諸人多少年才高氣銳互相標榜視當世無人七才子之名播天下擯先芳維岳不與已而榛亦被擯

攀龍遂爲之魁其持論謂文自西京詩自天寶而下俱無足觀於本朝獨推李夢陽諸子翕然和之非是則詆爲宋學攀龍才思勁警名最高獨心重世貞天下亦並稱王李又與李夢陽何景明並稱何李王李其爲詩務以聲調勝所擬樂府或更古數字爲已作文則聱牙戟口讀者至不能終篇好之者推爲一代之宗亦多受世抉摘云自號滄溟梁有譽宗臣徐中行與國倫皆嘉靖三十九年進士有譽除刑部主事居三年以念母告歸杜門讀書大吏至辭不見卒年三十六宗臣字子相揚州興化人由刑部主事調考功謝病歸築室百花洲上

讀書其中起故官移文選進稽勲員外郎嚴嵩惡之出  
為福建參議倭薄城臣守西門納鄉人避難者萬人或  
言賊且迫曰我在不憂賊也與主者共擊退之尋遷提  
學副使卒官士民皆哭徐中行字子與長興人美姿容  
善飲酒由刑部主事歷員外郎郎中稍遷汀州知府廣  
東賊蕭五來犯禦之有功策其且走俾武平令徐甫宰  
邀擊之讓功甫宰甫宰得優擢尋以父憂歸補汝寧坐  
大計貶長蘆鹽運判官遷湖廣僉事掩捕湖盜柯彩鳳  
得其積貯活饑民萬餘累官江西左布政使萬曆六年  
卒官中行性好客無賢愚貴賤應之不倦故其死也人

多哀之吳國倫字明卿興國人由中書舍人擢兵科給  
事中楊繼盛死倡眾賻送忤嚴嵩假他事謫江西按察  
司知事量移南康推官調歸德居二歲棄去嵩敗起建  
寧同知累遷河南左參政大計罷歸國倫才氣橫放好  
客輕財歸田後聲名籍甚求名之士不東走太倉則西  
走興國萬曆時世貞既沒國倫猶無恙在七子中最為  
老壽

王世貞字元美太倉人右都御史忤子也生有異稟書  
過目終身不忘年十九舉嘉靖二十六年進士授刑部  
主事世貞好為詩古文官京師入王宗沐李先芳吳維

見卷三頁十一 列傳 二  
岳等詩社又與李攀龍宗臣梁有譽徐中行吳國倫輩相倡和紹述何李名日益盛屢遷員外郎郎中奸人閻姓者犯法匿錦衣都督陸炳家世貞搜得之炳介嚴嵩以請不許楊繼盛下吏時進湯藥其妻訟夫寃爲代草旣死復棺殮之嵩大恨吏部兩擬提學皆不用用爲青州兵備副使父忬以灤河失事嵩構之論死繫獄世貞解官奔赴與弟世懋日蒲伏嵩門涕泣求貸嵩陰持忬獄而時爲謾語以寬之兩人又日因服跽道旁遮諸貴人輿搏額乞救諸貴人畏嵩不敢言忬竟死西市兄弟哀號欲絕持喪歸蔬食三年不入內寢旣除服猶却冠

帶苴履葛巾不赴宴會隆慶元年八月兄弟伏闕訟父寃言爲嵩所害大學士徐階左右之復忬官世貞意不欲出會詔求直言疏陳法祖宗正殿名廣恩義寬禁例修典章推德意昭爵賞練兵實八事以應詔無何吏部用言官薦令以副使涖大名遷浙江右參政山西按察使母憂歸服除補湖廣旋改廣西右布政使入爲太僕卿萬曆二年九月以右副都御史撫治鄖陽數條奏屯田戍守兵食事宜咸切大計有好僧僞稱樂平王次子奉高皇帝御容金牒行游天下世貞曰宗藩不得出城而譁張如此必僞也捕訊之服辜張居正枋國以世貞

同年生有意引之世貞不甚親附所部荊州地震引京  
房占謂臣道太盛坤維不寧用以諷居正居正婦弟辱  
江陵令世貞論奏不少貸居正積不能堪會遷南京大  
理卿爲給事中楊節所劾卽取旨罷之後起應天府尹  
復被劾罷居正歿起南京刑部右侍郎辭疾不赴久之  
所善王錫爵秉政起南京兵部右侍郎先是世貞爲副  
都御史及大理卿應天尹與侍郎品皆正三世貞通理  
前倖得考滿廕子比擢南京刑部尚書御史黃世榮言  
世貞先被劾不當計倖據故事力爭世貞乃三疏移疾  
歸二十一年卒於家世貞始與李攀龍狎主文盟攀龍

歿獨操柄二十年才最高地望最顯聲華意氣籠蓋海  
內一時士大夫及山人詞客衲子羽流莫不奔走門下  
片言褒賞聲價驟起其持論文必西漢詩必盛唐大曆  
以後書勿讀而藻飾太甚晚年攻者漸起世貞顧漸造  
平淡病亟時劉鳳往視見其手蘇子瞻集諷翫不置也  
世貞自號鳳洲又號弇州山人其所與遊者大氏見其  
集中各爲標目曰前五子者攀龍中行有譽國倫臣也  
後五子則南昌余曰德蒲圻魏裳歛汪道昆銅梁張佳  
允新蔡張九一也廣五子則崑山俞允文濬盧柟濮州  
李先芳孝豐吳維岳順德歐大任也續五子則陽曲王

道行東明石星從化黎民表南昌朱多燧常熟趙用賢也未五子則京山李維禎鄞屠隆南樂魏允中蘭谿胡應麟而用賢復與焉其所去取頗以好惡爲高下余曰德字德甫張佳允字肖甫張九一字助甫世貞詩所謂吾黨有三甫也魏裳字順甫與曰德俱嘉靖二十九年進士曰德終福建副使裳終濟南知府九一嘉靖三十二年進士終巡撫寧夏僉都御史佳允自有傳汪道昆字伯玉世貞同年進士大學士張居正亦其同年生也父七十壽道昆文當其意居正亟稱之世貞筆之藝苑卮言曰文繁而有法者于鱗簡而有法者伯玉道昆由

是名大起晚年官兵部左侍郎世貞亦嘗貳兵部天下稱兩司馬世貞頗不樂嘗自悔獎道昆爲違心之論云胡應麟幼能詩萬曆四年舉於鄉久不第築室山中攜書四萬餘卷手自編次多所撰著攜詩謁世貞世貞喜而激賞之歸益自負所著詩藪二十卷大抵奉世貞卮言爲律令而敷衍其說謂詩家之有世貞集大成之尼父也其貢諛如此世貞弟世懋字敬美嘉靖三十八年成進士卽遭父憂父雪始選南京禮部主事歷陝西福建提學副使再遷太常少卿先世貞三年卒好學善詩文名亞其兄世貞力推引之以爲勝已攀龍道昆輩因

稱爲少美世貞子士騏字罔伯舉鄉試第一登萬曆十七年進士終吏部員外郎亦能文

歸有光字熙甫崑山人九歲能屬文弱冠盡通五經三史諸書師事同邑魏校嘉靖十九年舉鄉試入上春官不第徙居嘉定安亭江上讀書談道學徒常數百人稱爲震川先生四十四年始成進士授長興知縣用古教化爲治每聽訟引婦女兒童案前刺刺作吳語斷訖遣去不具獄大吏令不便輒寢閣不行有所擊斷直行已意大吏多惡之調順德通判專轄馬政明世進士爲令無遷倖者名爲遷實重抑之也隆慶四年大學士高拱

趙貞吉雅知有光引爲南京太僕丞留掌內閣制敕房修世宗實錄卒官有光爲古文原本經術好太史公書得其神理時王世貞主盟文壇有光力相舐排曰爲妄庸巨子世貞大憾其後亦心折有光爲之讚曰千載有公繼韓歐陽余豈異趨久而自傷其推重如此有光少子子慕字季思舉萬曆十九年鄉試再被放卽屏居江村與無錫高攀龍最善其歿也巡按御史祁彪佳請於朝贈翰林待詔有光制舉義湛深經術卓然成大家後德清胡友信與齊名世並稱歸胡友信字成之隆慶二年進士授順德知縣歲賦率奸胥攬輸稍以所入啗長

明史卷二百八十七終  
友信 三  
吏謂之月錢友信與民約歲爲三限多寡皆自輸不取  
贏閭里無妄費而公賦以充海寇竊發官軍往討民間  
驛騷部內烏洲大洲賊所巢穴諸惡少爲賊耳目友信  
悉勾得之捕誅其魁餘黨解散鄉立四應社一鄉有警  
三鄉鼓而援之不援者罪同賊賊不敢發歲大凶民饑  
死無敢爲惡者初友信慮民輕法泣以嚴後令行禁止  
更爲寬大或旬日不答一人其治縣如家弊修墮舉學  
校城池咸爲一新督課邑子弟教化興起卒官士民立  
祠奉祀友信博通經史學有根柢明代舉子業最擅名  
者前則王鏊唐順之後則震川思泉思泉友信別號也

明史卷二百八十七終



明史卷二百八十八

列傳第一百七十六

敕修

總裁高鳳翥 纂修 經筵講官保兼太子太保保和殿大學士兼管吏部戶部尚書郭汝霖 級張廷玉 蔡奉

文苑四

李維楨 郝敬

徐渭 屠隆

王穉登 俞允文 王叔承

瞿九思

唐時升 程嘉燧 李流芳

焦竑 黃輝 陳仁錫

董其昌 莫如忠 米萬鍾 邢侗

袁宏道 鍾惺 譚元春

王惟儉 李日華

曹學佺 會異撰

王志堅

艾南英 章世純 羅萬藻

陳際泰

張溥 張采

李維楨字本寧京山人父裕福建布政使維楨舉隆慶二年進士由庶吉士授編修萬曆時穆宗實錄成進修撰出爲陝西右參議遷提學副使浮湛外僚幾三十年天啓初以布政使家居年七十餘矣會朝議登用耆舊召爲南京太僕卿旋改太常未赴聞諫官有言辭不就時方修神宗實錄給事中薛大中特疏薦之未及用四年四月太常卿董其昌復薦之乃召爲禮部右侍郎甫三月進尚書並在南京維楨緣史事起用乃館中諸臣憚其以前輩壓已不令人館但超遷其官維楨相亦以年

衰明年正月力乞骸骨去又明年卒於家年八十崇禎時贈太子太保維楨弱冠登朝博聞強記與同館許國齊名館中爲之語日記不得問老許做不得問小李維楨爲人樂易闊達賓客雜進其文章弘肆有才氣海內請求者無虛日能屈曲以副其所望碑版之文照耀四裔門下士招富人大賈受取金錢代爲請乞亦應之無倦負重名垂四十年然文多率意應酬品格不能高也邑人郝敬字仲輿父承健舉於鄉官肅寧知縣敬幼稱神童性踈弛嘗殺人繫獄維楨其父執也援出之館於家始折節讀書舉萬曆十七年進士歷知縉雲永嘉二

縣竝有能聲徵授禮科給事中乞假歸養久之補戶科  
數有所論奏山東稅監陳增貪橫爲益都知縣吳宗堯  
所奏帝不罪敬上言開採不罷則陛下明旨不過爲愚  
弄臣民之虛文乞先停止然後以宗堯所奏下撫按勘  
覈正增不法之罪不聽頃之山東巡撫尹應元亦極論  
增罪帝怒切責應元斥宗堯爲民敬再上言陛下處陳  
增一事甚失衆心帝怒奪俸一年帝遣中官高案權稅  
京口暨祿權稅儀真敬復力諫宗堯之劾增也曾怒甚  
誣訐其贓私詞連青州一府官僚旁引商民吳時奉等  
請皆籍沒帝輒可之敬復力詆增乞速寢其奏亦不納

坐事謫知江陰縣貪污不檢物論皆不予遂投劾歸杜  
門著書崇禎十二年卒

徐渭字文長山陰人十餘歲傲楊雄解嘲作釋毀長師  
同里季本爲諸生有盛名總督胡宗憲招致幕府與歛  
余寅鄞沈明臣同筦書記宗憲得白鹿將獻諸朝令渭  
草表并他客草寄所善學士擇其尤上之學士以渭表  
進世宗大悅益寵異宗憲宗憲以是益重渭宗憲嘗宴  
將吏於爛柯山酒酣樂作明臣作饒歌十章中有云狹  
巷短兵相接處殺人如草不聞聲宗憲起將其鬚曰何  
物沈生雄快乃爾卽命刻於石寵禮與渭埒督府勢嚴

重將吏莫敢仰視渭角巾布衣長揖縱談幕中有急需  
夜深開戟門以待渭或醉不至宗憲顧善之寅明臣亦  
頗負崖岸以侃直見禮渭知兵好奇計宗憲禽徐海誘  
王直皆預其謀藉宗憲勢頗橫及宗憲下獄渭懼禍遂  
發狂引巨錐刺耳深數寸又以椎碎腎囊皆不死已又  
擊殺繼妻論死繫獄里人張元怵力救得免乃游金陵  
抵宣遠縱觀諸邊阨塞善李成梁諸子入京師主元怵  
元怵導以禮法渭不能從久之怒而去後元怵卒白衣  
往弔撫棺慟哭不告姓名去渭天才超軼詩文絕出倫  
輩善草書工寫花草竹石嘗自言吾書第一詩次之文

次之畫又次之當嘉靖時王李倡七子社謝榛以布衣  
被擯渭憤其以軒冕壓韋布誓不入二人黨後二十年  
公安袁宏道游越中得渭殘帙以示祭酒陶望齡相與  
激賞刻其集行世寅字仲房明臣字嘉則皆有詩名曆  
隆者字長卿明臣同邑人也生有異才嘗學詩於明臣  
落筆數千言立就族人大山里人張時徹方爲貴官共  
相延譽名大噪舉萬曆五年進士除潁上知縣調繁青  
浦時招名士飲酒賦詩游九峰三泖以仙令自詡然於  
吏事不廢士民皆愛戴之遷禮部主事西寧侯宋世懋  
兄事隆宴游甚歡刑部主事俞顯卿者險人也嘗爲隆

所詆心恨之許隆與世恩淫縱詞連禮部尚書陳經邦  
隆等上疏自理并列顯卿挾仇誣陷狀所司乃兩黜之  
而停世恩俸半歲隆歸道青浦父老爲斂田千畝請徙  
居隆不許歡飲三日謝去歸益縱情詩酒好賓客賣文  
爲活詩文率不經意一揮數紙嘗戲命兩人對案拈二  
題各賦百韻咄嗟之間二章並就又與人對奕口誦詩  
文命人書之書不逮誦也子婦沈氏修撰懋學女與隆  
女瑤瑟並能詩隆有所作兩人輒和之兩家兄弟合刻  
其詩曰留香草

王穉登字伯穀長洲人四歲能屬對六歲善擘窠大字

十歲能詩長益駿發有盛名嘉靖末遊京師客大學士  
袁煒家煒試諸吉士紫牡丹詩不稱意命穉登爲之有  
警句煒召數諸吉士曰君輩職文章能得王秀才一句  
耶將薦之朝不果隆慶初復遊京師徐階當國頗修憾  
於煒或勸穉登弗名袁公客不從刻燕市客越二集備  
書其事吳中自文徵明後風雅無定屬穉登嘗及徵明  
門遙接其風主詞翰之席者三十餘年嘉隆萬曆間布  
衣山人以詩名者十數俞允文王叔承沈明臣輩尤爲  
世所稱然聲華烜赫穉登爲最申時行以元老里居特  
相推重王世貞與同郡友善顧不甚推之及世貞歿其

仲子士驪坐事繫獄穉登爲傾身救援人以是重其風  
義萬曆中詔修國史大學士趙志臯輩薦穉登及其同  
邑魏學禮江都陸弼黃岡王一鳴有詔徵用未上而史  
局罷卒年七十餘子留字亦房亦以詩名俞允文字仲  
蔚崑山人其父舉進士官大理評事允文年十五爲馬  
鞍山賦援據該博年未四十謝去諸生專力於詩文書  
法與王世貞善而不喜李攀龍詩其持論不苟同如此  
王叔承字承父吳江人少孤治經生業以好古謝去貧  
贅婦家爲婦翁所逐不予一錢乃攜婦歸奉母貧益甚  
入都客大學士李春芳所性嗜酒春芳有所撰述覓之

往往臥酒樓欠伸弗肯應久之乃謝歸太倉王錫爵其  
布衣交也再召會有三王並封之議叔承遺書數千言  
謂當引大義以去就力爭不當依違兩端負主恩辜物  
望錫爵得書歎服其詩極爲世貞兄弟所許卒於萬曆  
中

瞿九思字睿夫黃梅人父晟嘉靖三十二年進士歷官  
廣平知府鑿長渠三百里引水爲四閘得田數十萬畝  
卒於官九思十歲從父宦吉安事羅洪先十五作定志  
論後從同郡耿定向游學益進舉萬曆元年鄉試居二  
年縣令張維翰違制苛派民聚毆之維翰坐九思倡亂

甲寅卷三十一 列傳 九  
巡按御史向程劾維翰激變吏部尚書張瀚言御史議  
非是九思遂長流塞下子甲年十三爲書數千言歷抵  
公卿訟父寃甲弟罕亦伏闕上書求宥屠隆作訟瞿生  
書遍告中外馮夢禎亦白於楚中當事而張居正故才  
九思乃獲釋歸二十七年以撫按疏薦授翰林待詔力  
辭不受詔有司歲給米六十石終其身乃撰樂章及萬  
曆武功錄遣罕詣闕上之卒年七十一九思學極奧博  
其文章不雅馴然一時嗜古篤志之士亦鮮其儔甲字  
釋之年十九舉於鄉早卒罕字曰有七歲能文白父寃  
時往返徒步不避寒餒天下稱雙孝崇禎時辟舉知州

唐時升字叔達嘉定人父欽訓與歸有光善故時升早  
登有光之門年未三十謝舉子業專意古學王世貞官  
南都延之邸舍與辨晰疑義時升自以出歸氏門不肯  
復稱王氏弟子及王錫爵枋國其子衡邀時升入都值  
塞上用兵逆斷其情形虛實將帥勝負無一爽者家貧  
好施子灌園藝蔬蕭然自得詩援筆成不加點竄文得  
有光之傳與里人婁堅程嘉燧並稱曰練川三老卒於  
崇禎九年年八十有六婁堅字子柔幼好學其師友皆  
出有光門堅學有師承經明行修鄉里推爲大師貢於  
國學不仕而歸工書法詩亦清新四明謝三賓知縣事

日見卷三頁一八 友傳 十一  
合時升堅嘉燧及李流芳詩刻之曰嘉定四先生集流  
芳字長蘅萬曆三十四年舉於鄉工詩善書尤精繪事  
天啓初會試北上抵近郊聞警賦詩而返遂絕意進取  
程嘉燧字孟陽休寧人僑居嘉定工詩善畫與通州顧  
養謙善友人勸詣之乃渡江寓古寺與酒人歡飲三日  
夜賦咏古五章不見養謙而返崇禎中常熟錢謙益以  
侍郎罷歸築耦耕堂邀嘉燧讀書其中閱十年返休寧  
遂卒年七十有九謙益最重其詩稱曰松圓詩老

焦竑字弱侯江寧人爲諸生有盛名從督學御史耿定  
向學復質疑於羅汝芳舉嘉靖四十二年鄉試下第還  
定向選十四郡名士讀書崇正書院以竑爲之長及定  
向里居復往從之萬曆十七年始以殿試第一人官翰  
林修撰益討習國朝典章二十二年大學士陳于陞建  
議修國史欲竑專領其事竑遜謝乃先撰經籍志其他  
率無所撰館亦竟罷翰林教小內侍書者衆視爲具文  
竑獨曰此曹他日在帝左右安得忽之取古奄人善惡  
時與論說皇長子出閣竑爲講官故事講官進講罕有  
問者竑講畢徐曰博學審問功用維均敷陳或未盡惟  
殿下賜明問皇長子稱善然無所質難也一日竑復進  
曰殿下言不易發得毋諱其誤耶解則有誤問復何誤



古人不恥下問願以爲法皇長子復稱善亦竟無所問  
竝乃與同列謀先啓其端適講舜典竝舉稽於衆舍已  
從人爲問皇長子曰稽者考也考集衆思然後舍己之  
短從人之長又一日舉上帝降衷若有恒性皇長子曰  
此無他卽天命之謂性也時方十三齡答問無滯竝亦  
竭誠啓迪嘗講次羣鳥飛鳴皇長子仰視竝輟講肅立  
皇長子歛容聽乃復講如初竝嘗採古儲君事可爲法  
戒者爲養正圖說擬進之同官郭正域輩惡其不相聞  
目爲賈譽竝遂止竝旣負重名性復疎直時事有不可  
輒形之言論政府亦惡之張位尤甚二十五年壬順天

鄉試舉子曹蕃等九人文多險誕語竝被劾謫福寧州  
同知歲餘大計復鐫秩竝遂不出竝博極羣書自經史  
至稗官雜說無不淹貫善爲古文典正馴雅卓然名家  
集名澹園竝所自號也講學以汝芳爲宗而善定向兒  
弟及李贄時頗以禪學譏之萬曆四十八年卒年八十  
熹宗時以先朝講讀恩復官贈諭德賜祭廕子福王時  
追謚文端子潤生見忠義傳黃輝字平倩一字昭素南  
充人竝同年進士幼穎異父子元官湖廣御史屬訊疑  
獄輝檢律如老吏御史聞而異之命負以至授錢穀集  
一覽輒記稍長博極羣書年十五舉鄉試第一久之成

進士改庶吉士館課文字多沿襲熟爛目爲翰林體及  
李攀龍王世貞之學行則又改而從之輝刻意學古一  
以韓歐爲師館閣文稍變時同館中詩文推陶望齡書  
畫推董其昌輝詩及書與齊名至徵事輝十得八九竝  
以閎雅名亦自遜不如也由編修遷右中允充皇長子  
講官時帝寵鄭貴妃疎皇后長子長子生母王恭妃幾  
殆輝從內豎徵知其狀謂同里給事中王德完曰此國  
家大事旦夕不測書之史冊謂朝廷無人吾輩爲萬世  
謬矣德完奮然屬輝具草上之下獄廷杖瀕死輝周旋  
彙館不避險阻人或危之輝曰吾陷人於禍可坐視乎

輝雅好禪學多方外交爲言者所論時已爲庶子掌司  
經局遂請告歸已起故官擢少詹事兼侍讀學士卒官  
陳仁錫字明卿長洲人父允堅進士歷知諸暨崇德二  
縣仁錫年十九舉萬曆二十五年鄉試聞武進錢一本  
善易往師之得其指要久不第益究心經史之學多所  
論著天啓二年以殿試第三人授翰林編修時第一爲  
文震孟亦老成宿學海內咸慶得人明年丁內艱廬墓  
次服闋起故官尋直經筵典誥敕魏忠賢冒邊功矯旨  
錫上公爵給世券仁錫當視草持不可其黨以威劫之  
毅然曰世自有視草者何必我忠賢聞之怒不數日里

人孫文豸以誦步天歌見捕坐妖言鍛鍊成獄詞連仁錫及震孟罪將不測有密救者得削籍歸崇禎改元召復故官旋進右中允署國子司業事再直經筵以預修神光二朝實錄進右諭德乞假歸越三年卽家起南京國子祭酒甫拜命得疾卒福王時贈詹事諡文莊仁錫講求經濟有志天下事性好學喜著書一時館閣中博洽者鮮其儔云

董其昌字元宰松江華亭人舉萬曆十七年進士改庶吉士禮部侍郎田一儁以教習卒官其昌請假走數千里護其喪歸葬還授編修皇長子出閣充講官因事啟

沃皇長子每日屬之坐失執政意出爲湖廣副使移疾歸起故官督湖廣學政不徇請囑爲勢家所怨嫉生僮數百人鼓譟毀其公署其昌卽拜疏求去帝不許而令所司按治其昌卒謝事歸起山東副使登萊兵備河南參政並不赴光宗立問舊講官董先生安在乃召爲太常少卿掌國子司業事天啓二年擢本寺卿兼侍讀學士時修神宗實錄命往南方採輯先朝章疏及遺事其昌廣搜博徵錄成三百本又採留中之疏切於國本藩封人才風俗河渠食貨吏治邊防者別爲四十卷做史贊之例每篇繫以筆斷書成表進有詔褒美宣付史館

明年秋擢禮部右侍郎協理詹事府事尋轉左侍郎五年正月拜南京禮部尚書時政在奄豎黨禍酷烈其言深自引遠踰年請告歸崇禎四年起故官掌詹事府事居三年屢疏乞休詔加太子太保致仕又二年卒年八十有三贈太子太傅福王時諡文敏其昌天才俊逸少負重名初華亭自沈度沈粲以後南安知府張弼詹事陸深布政莫如忠及子是龍皆以善書稱其昌後出超越諸家始以宋米芾爲宗後自成一家名聞外國其畫集宋元諸家之長行以己意瀟灑生動非人力所及也四方金石之刻得其制作手書以爲二絕造請無虛日

尺素短札流布人間爭購寶之精於品題收藏家得片語隻字以爲重性和易通禪理蕭閒吐納終日無俗語人儼之米芾趙孟頫云同時以善書名者臨邑邢侗順天米萬鍾晉江張瑞圖時人謂邢張米董又曰南董北米然三人者不逮其昌遠甚莫如忠字子長嘉靖十七年進士累官浙江布政使潔修自好夏言死經紀其喪善草書詩文有體要是龍字雲卿後以字行更字廷韓十歲能文長善書皇甫汈王世貞輩亟稱之以貢生終邢侗字子愿萬曆二年進士終陝西行太僕卿家資鉅萬築來禽館於古犁邱減產奉客遂致中落妹慈靜善

做兄書米萬鍾字友石萬曆二十三年進士歷官江西按察使天啓五年魏忠賢黨倪文煥劾之遂削籍崇禎初起太僕少卿卒官張瑞圖者官至大學士逆案中人也

袁宏道字中郎公安人與兄宗道弟中道並有才名時稱三袁宗道字伯修萬曆十四年會試第一授庶吉士進編修卒官右庶子泰昌時追錄光宗講官贈禮部右侍郎宏道年十六爲諸生卽結社城南爲之長閒爲詩歌古文有聲里中舉萬曆二十年進士歸家下帷讀書詩文主妙悟選吳縣知縣聽斷敏決公庭鮮事與士大

夫談說詩文以風雅自命已而解官去起授順天教授歷國子助教禮部主事謝病歸久之起故官尋以清望擢吏部驗封主事改文選尋移考功員外郎立歲終考察羣吏法言外官三歲一察京官六歲武官五歲此曹安得獨免疏上報可遂爲定制遷稽勲郎中後謝病歸數月卒中道字小修十餘歲作黃山雪二賦五千餘言長益豪邁從兩兄宦游京師多交四方名士足跡半天下萬曆三十一年始舉於鄉又十四年乃成進士由徽州教授歷國子博士南京禮部主事天啓四年進南京吏部郎中卒於官先是王李之學盛行袁氏兄弟獨心

非之宗道在館中與同館黃輝力排其說於唐好自樂  
天於宋好蘇軾名其齋曰白蘇至宏道益矯以清新輕  
俊學者多舍王李而從之目爲公安體然戲謔嘲笑間  
雜俚語空疎者便之其後王李風漸息而鍾譚之說大  
熾鍾譚者鍾惺譚元春也惺字伯敬竟陵人萬曆三十  
八年進士授行人稍遷工部主事尋改南京禮部進郎  
中擢福建提學僉事以父憂歸卒於家惺貌寢羸不勝  
衣爲人嚴冷不喜接俗客由此得謝人事官南都僦秦  
淮水閣讀史恒至丙夜有所見卽筆之名曰史懷晚逃  
於禪以卒自宏道矯王李詩之弊倡以清真惺復矯其

弊變而爲幽深孤峭與同里譚元春評選唐人之詩爲  
唐詩歸又評選隋以前詩爲古詩歸鍾譚之名滿天下  
謂之竟陵體然兩人學不甚富其識解多僻大爲通人  
所譏元春字友夏名輩後於惺以詩歸故與齊名至天  
啓七年始舉鄉試第一惺已前卒矣  
王惟儉字損仲祥符人萬曆二十三年進士授濰縣知  
縣遷兵部職方主事三十年春遼東總兵官馬林以忤  
稅使高淮被逮兵部尚書回樂等救之帝怒責職方不  
推代者空司而逐惟儉亦削籍歸家居二十年光宗立  
起光祿丞三遷大理少卿天啓三年八月擢右僉都御

史巡撫山東值徐鴻儒之亂民多逃亡遼人避難來者亦多失所惟儉加意綏輯五年三月擢南京兵部右侍郎未赴入爲工部右侍郎魏忠賢黨御史田景新劾之落職間住惟儉資敏嗜學初被廢肆力經史百家苦宋史繁無手刪定自爲一書好書畫古玩萬曆天啓間世所稱博物君子惟儉與董其昌並而嘉興李日華亞之日華字君實嘉興人萬曆二十年進士官至太僕少卿恬澹和易與物無忤惟儉則口多微詞好抨擊道學人不能堪嘗與時輩讎集徵漢書一事具悉本末指其腹笑曰名下寧有虛士乎其自喜如此

曹學佺字能始侯官人弱冠舉萬曆二十三年進士授戶部主事申察典調南京添注大理左寺正居冗散七年肆力於學累遷南京戶部郎中四川右參政按察使蜀府燬於火估修資七十萬金學佺以宗藩條例却之又中察典議調天啓二年起廣西右參議初挺擊獄興劉廷元輩主瘋顛學佺著野史紀畧直書事本末至六年秋學佺遷陝西副使未行而廷元附魏忠賢大幸乃劾學佺私撰野史淆亂國章遂削籍燬所鏤板巡按御史王政新以嘗薦學佺亦勒閒住廣西大吏揣學佺必得重禍羈留以待已知忠賢無意殺之乃得釋還崇禎

初起廣西副使力辭不就家居二十年著書所居石倉園中爲石倉十二代詩選盛行於世嘗謂二氏有藏吾儒何獨無欲修儒藏與鼎立采擷四庫書因類分輯十有餘年功未及竣兩京繼覆唐王立於閩中起授太常卿尋遷禮部右侍郎兼侍講學士進尚書加太子太保及事敗走入山中投繯而死年七十有四詩文甚富總名石倉集萬曆中閩中文風頗盛自學佺倡之晚年更以殉節著云其同邑後起者曾異撰字弗人晉江人家侯官父爲諸生早卒母張氏以遺腹生家窶甚紡績給晨夕異撰起孤童事母至孝歲饑採蓼葉雜糠粒食之

母妻嘗負畚鋤乾草給爨然性介甚長吏知其貧欲爲地不屑也吳興潘曾絃督學政上其母節行獲旌於朝及曾絃巡撫南贛得王惟儉所撰宋史招異撰及新建徐世濟更定未成而罷異撰久爲諸生究心經世學所爲詩有奇氣崇禎十二年舉鄉試年四十有九矣再赴會試還遂卒

王志堅字弱生崑山人父臨亨進士杭州知府志堅舉萬曆三十八年進士授南京兵部主事遷員外郎郎中暇日要同舍郎爲讀史社撰讀史商語遷貴州提學僉事不赴乞侍養歸天啓二年起督浙江驛傳奔母喪歸



崇禎四年復以僉事督湖廣學政禮部推爲學政第二  
六年卒於官志堅少與李流芳同學爲詩文法唐宋名  
家通籍後卜居吳門古南園杜門却掃肆志讀書先經  
後史先史後子集其讀經先箋疏而後辨論讀史先證  
據而後發明讀子則謂唐宋而後無子當取說家之有  
裨經史者補之讀集則定秦漢以後古文爲五編考覈  
唐宋碑志援史傳摭雜說以參覈其事之同異文之純  
駁其於內典亦深辨性相之宗作詩甚富自選止七十  
餘首弟志長字平仲舉於鄉亦深於經學

艾南英字千子東鄉人七歲作竹林七賢論長爲諸生

好學無所不窺萬曆末場屋文腐爛南英深疾之與同  
郡章世純羅萬藻陳際泰以興起斯文爲任乃刻四人  
所作行之世世人翕然歸之稱爲章羅陳艾天啓四年  
南英始舉於鄉座主檢討丁乾學給事中郝土膏發策  
詆魏忠賢南英對策亦有譏刺語忠賢怒削考官籍南  
英亦停三科莊烈帝卽位詔許會試久之卒不第而文  
日有名負氣陵物人多憚其口始王李之學大行天下  
談古文者悉宗之後鍾譚出而一變至是錢謙益負重  
名於詞林痛相糾駁南英和之排詆王李不遺餘力兩  
京繼覆江西郡縣盡失南英乃入閩唐王召見陳十可

憂疏授兵部主事尋改御史明年八月卒於延平章世  
純字大力臨川人博聞強記舉天啓元年鄉試崇禎中  
累官柳州知府年已七十矣聞京師變悲憤遘疾卒羅  
萬藻字文止世純同縣人天啓七年舉於鄉崇禎中行  
保舉法祭酒倪元璐以萬藻應詔辭不就福王時爲上  
杭知縣唐王立於閩擢禮部主事南英卒哭而殯之居  
數月亦卒陳際泰字大士亦臨川人父流寓汀州武平  
生於其地家貧不能從師又無書時取旁舍兒書屏人  
竊誦從外兄所獲書經四角已漫滅且無句讀自以意  
識別之遂通其義十歲於外家藥籠中見時經取而疾

走父見之怒督往田則攜至田所踞高阜而哦遂畢身  
不忘久之返臨川與南英輩以時文名天下其爲文敏  
甚一日可二三十首先後所作至萬首經生舉業之富  
無若際泰者崇禎三年舉於鄉又四年成進士年六十  
有八矣又三年除行人居四年護故相蔡國用喪南行  
卒於道

張溥字天如太倉人伯父輔之南京工部尚書溥幼嗜  
學所讀書必手鈔鈔已朗誦一過卽焚之又鈔如是者  
六七始已右手握管處指掌成繭冬日手皸日沃湯數  
次後名讀書之齋曰七錄以此也與同里張采共學齊

名號婁東二張崇禎元年以選貢生入都采方成進士  
兩人名徹都下已而采官臨川溥歸集郡中名士相與  
復古學名其文社曰復社四年成進士改庶吉士以葬  
親乞假歸讀書若經生無間寒暑四方噉名者爭走其  
門盡名爲復社溥亦傾身結納交游曰廣聲氣通朝右  
所品題甲乙頗能爲榮辱諸奔走附麗者輒自矜曰吾  
以嗣東林也執政大僚由此惡之里人陸文聲者輸貲  
爲監生求入社不許采又嘗以事扶之文聲詣闕言風  
俗之弊皆原於士子溥采爲主盟倡復社亂天下溫體  
仁方枋國事下所司遷延久之提學御史倪元珙兵備

參議馮元颺太倉知州周仲連言復社無可罪二人皆  
貶斥嚴旨窮究不已閩人周之夔者嘗爲蘇州推官坐  
事罷去疑溥爲之恨甚聞文聲許溥遂伏闕言溥等把  
持計典已罷職實其所爲因及復社恣橫狀章下巡撫  
張國維等言之夔去官無預溥事亦被旨譙讓至十四  
年溥已卒而事猶未竟刑部侍郎蔡奕琛坐黨薛國觀  
繫獄未知溥卒也許溥遙握朝柄已罪由溥因言采結  
黨亂政詔責溥采回奏采上言復社非臣事然臣與溥  
生平相淬礪死避網羅負義圖全誼不出此念溥日夜  
解經論文矢心報稱曾未一日服官懷忠入地卽今嚴

綸之下并不得泣血自明良足哀悼當是時體仁已前  
罷繼者張至發薛國觀皆不喜東林故所司不敢復奏  
及是至發國觀亦相繼罷而周延儒當國溥座主也其  
獲再相溥有力焉故采疏上事即得解明年御史劉熙  
祚給事中姜采交章言溥祗行博聞所纂述經史有功  
聖學宜取備乙夜觀帝御經筵問及二人延儒對曰讀  
書好秀才帝曰溥已卒采小臣言官何爲薦之延儒曰  
二人好讀書能文章言官爲舉子時讀其文又以其用  
未竟故惜之耳帝曰亦未免偏延儒言誠如聖諭溥與  
黃道周皆偏因善讀書以故惜之者衆帝領之遂有詔



徵溥遺書而道周亦復官有司先後錄上三千餘卷帝  
悉留覽溥詩文敏捷四方徵索者不起草對客揮毫俄  
頃立就以故名高一時卒時年止四十采字受先與溥  
善溥性寬泛交博愛采特嚴毅喜甄別可否人有過嘗  
面叱之知臨川摧強扶弱聲大起移疾歸士民泣送載  
道知州劉士斗錢肅樂嚴重之以奸蠹詢采片紙報咸  
置之法福王時起禮部主事進員外郎乞假去南都失  
守奸人素銜采者羣擊之死復用大錐亂刺之已而甦  
避之鄰邑又三年卒

